


# EHULELO YA MUKHORA

 Oreeriwa okhala otapernakulu! Ni, yaari yoohiwehereriwa vakhani wa miyo. Miyo, kisuwelaka wira ohiy'ula waari ohiyu wa ekomunyawu, kweekwe okisivela, miyo kakhala-ru vakhiviru khula nipuro, okhalela mpantte ekomunyawu. Okhala wira ti...Kinoona wira aKristu othene yaahaana ophavela waakhela ekomunyawu, okhala wira Yesu oohimya, "Mwaahikhuure, khamurina mpantte ni Miyo." Tivo, eyo e... kweekwe oreeriwa wuulupale wo—wo orwa mutapernakulu. Vano, ohiy'ula, Munna Neville ohimnye wira aahlala vammilo vakhani, ni—ni aatthuna wira kilavule ni muthukumano ahu. Miyo kimuleela wira kaamutthapela wira. Kaatthuna nave-tho ohimya wira vakhala . . .

<sup>2</sup> Meelo ohiyu muthukumano wa alopwana, maatiministratoore, meelo ohiyu, ni alipa a nakoso a okereja va, muthukumano aya woolimaleleya wa Sekunta ohiyu ni yawaya...ahaana ethanlelo yo wira ni mulipa-ooteka. Kinoona wira nyuwo othene munnisuwela saana wira awihu—awihu—etthokiheryo ahu yookupaliwa, ni ninoorowa owerya oteka ekereja. Nto siiso yookupaliwa, ni alakela enoopacerya esumana yeela. Ekereja empacerya esumana yeela, ntoko sinsuwelaaka. Ni khekupaliwe, wenno oJeffersonville. Masi naaronwe oIndianapolis, estaatu, nto awo khunitthuniherya, vano ninrowa oteka. Nto siiso enoopacerya, khino, esumana yeela. Ninoosuwela nuumala muthukumano meelo ohiyu. Vano nto nuumala muthukumano meelo ohiyu, yaahipacerye esumana yeela, yakhumelela etthu, mulipa-ooteka aahiwerye opacerya esumana yeela, nto onrowa opacerya esumana enttharelana.

<sup>3</sup> Ni emalelo ya esumana ela enrwa, Saapatu ohiyu, Ttiminku voosiisu ni Ttiminku ohiyu, ya esumana enrwa, Esaapatu ela enrwa ni Ettiminku, Apwiya yatthuna vale, kintthuna kikhalane-tho mu—mu—muthukumano, ipantte ttharu, ntoko siiralyahu isumana vakhani sivinre. Vano nto nuumala hiyo. . . Eyo enrowa okhala Saapatu ohiyu, vano nto Ttiminku voosiisu, nto nuumala Ttiminku ohiyu. Ela enttharelana, mahiku anrowaaya okhala muloko ni mararu ni muluko ni maxexe a mweeri yoola.

<sup>4</sup> Vano nto akina w'axinna ni miyo ninookhuma nuumala okathi yoowo, ninrowa oColorado, mukwaha w'orowa oxaya, nto ninootthika. Etapernakulu, yamalihiwa vale, wakhala-ru otthuna w'Apwiya, kintthuna kikuxe, khino, esumana yoomalela kihinatthi okhuma-tho orowa mmithukumanoni, ni kilavule sa *Ikanyeryo Thanu na piili* sa Wiisuupulula. Okathi vakhani ohinatthi. . . Ntoko silavunlyaahu sa *Okathi Mithanu na Miili wa Ekereja*, vano *Ikanyeryo Thanu na piili* wira sithareke Yeeyo.

<sup>5</sup> Ni alakela mwa isumana soophiyaka piili wala tthaaru sinttharelana, okhala wira kinoona wira enihimmwa wira, ni axilopwana anrowa oheliwa mmutekoni, awo anniwerya, hiyo ninoowerya oteka etapernakulu n'ukhalana mwa mahiku muloko, wala muloko ni mathanu, etthu ntoko yeeyo. Vano ninoorowa okhalana opuro w'okilaathi va woophiyaka vaara vaili wa atthu nirinaahu, wala vaara vararu, khino atthu oovikana. Nto mwaha wa yeeyo kaalipelelaaka mpakha okathi yoowo.

<sup>6</sup> Okhala wira, Esaapatu yookiserya ni Ttiminku, yaari yookattyamiha, moosuwela. Atthu yeemenle va iwoora piili sa oxekuwa, wira esarye etapernakulu, ekereja hata ehinatthi ohuliwa. Voosiisu aya, ewoora yaneethanu, nfurumeera onkhala vakhiviru ni miyo, arwaaka okhuma weiwo, khwira, "Yaahikhala atthu yaasanrye etapernakulu wothene ewoora ya neethanu voosiisu." Tivo, vano nto atthu, jaarwaaka, khuhikhala opuro, vano awo anoovolola ni anoorowa. Ni—ni nto ale anemela, ni oothukumanyeya ankhala oophunyana munvireloni, aniisoon a khala oophunyana, ni sothene. Ni kinniwoona athiyana yeemenle-ene vale, eviheriwaka, moosuwela, siiso, ni oviheriwa okhoowaka. Nto mulopwana onoovenya khunvaha muthiyana, ekhatera awe; vano nto owo onamweemela mpakha metto sawe owereya, nto mutthu mukina onoonvaha opuro. Moosuwela, ni siiso, ni ti yoowooniha othunku, ni aximai n'anamwane aretta ni sikina, ti yoonanara.

<sup>7</sup> Tivo, nimphavela omaliha eyo vano nitekaka etapernakulu yuulupale saana. Ni ninookhalana nipuro nooreera vaavo anamwane, imaara sikina...ni anthikileihaaya, ntoko anamwane axikhaani yinlasaka; ahe, ninrowa okhalana opuro wa yeeyo, wira aximai eweryeke okela, nlelo ekhaleke mmutekoni w'okokhorela, ni enaamulaleeriwa musaala. Ni okhalana isaala sa exikola ya Ttiminku ni sothene sooreheriwa ntoko sintthuneyaaya okhala. Nto eyo, Apwiya yatthuna vale, eniiraneya, esumana ela enrwa.

<sup>8</sup> Nyuwo othene moothanla ipursentu emiya yeeyo, tivo ninkhala ni yeeyo, moone. Ekereja ti yootaphuwa. Etthu ekereja nihimyaaya, ti yeeyo. Maatiministratoore wala mutthu mukina...Maatiministratoore arina, khula mmosa, mwaathanle mmosa. Pastore orina mwaathanle mmosa. Ti ekereja, iwo ti—ti elamulelo ya ekereja, eyuulupale ya ekereja. Ekereja, mwa yothene, ennilavula. Ti yeeyo tu. Ni ennisivela eyo, okhala wira hiyo kharina mapixipu wala ikhalelo s'oruma wala anamwaawehaxaxa atthu othene ni siiso wira enileeleke *ela, ele*, wala *ekina*. Ti Erooho Yoowaarya mukereja, enlavula. Okisivela yooruma eyo, ni ti yooreera saana.

<sup>9</sup> Ni kaahikoha, "Nyuwo othene muntthuna mulipelele mpakha nikhhalane voophiyerya wira nithamihe etapernakulu voopuroni niteke ekereja yuulupale?" Eyo yaari munikhuruni

na maatiministratoore, ni khiyaakhanle oomaliheriwaka ni maatiministratoore. Vano nto awo khukivekela, ntoko mulipa-oowehexaxa, wira kirwe kikohe ekereja. Vano miyo khwira, “Vano nihaana musurukhu oniphiyerya wira naacerereye munnuwelo wa ekereja ni okhaliha sothene voovirikana, ni itthu sothene, ovikana ele hiyo naarinaahu.” Miyo khwira, “Vano ninoowerya wira yeeyo naanaanoru, wala osuka musurukhu ahu mpakha niphwanye woophiyerya wira niteke ekereja yoomalela, esya, nipuro nikina.”

<sup>10</sup> Vano hiyo khumpaka mwaathanle wa yeeyo mukereja, ni khuthanliwa voowiiwanana wira “niteke ekereja naanaano va, ni waari paahi oteka ekereja yuulupale saana naanaano va.” Ni nikhanle ni yeeyo.

<sup>11</sup> Ni nikhuru va oJeffersonville khuhineemererya, khwira wira khinaakhanle wiiraka. Vano hiyo khuvira vasulu vaya, khurowa oIndianapolis khukeliha Estaatu mwa yeeyo. Vano nto awo khwaakhula, wira, “mutekeke,” nookhalana weemereriwa wira niteke. Vano nto epooma kherina-vo etthu vano, ti Estaatu erinavo etthu. Vano nto hiyo nookhalana otthuniheriwa, ni namateka ookhalana e—elisensa mmatatani naanaano va, ni miyo kinoona wira awo aalikana wira epacerye okathi p’ukathi.

<sup>12</sup> Ela meelo ohiyu, na—namateka ahimya wira onttuna opacerya esumana enrwa, vano kinoohiya paahi mithukumano wa e...mpakha niphierye *Ikanyeryo Thanu na piili*. Vano nto vakhala wira namateka khonwerya opacerya esumana enrwa, vano Ettiminku enttharelana, Saapatu ni Ttiminku, kinookhalana muthukumano kihinatthi orowa.

<sup>13</sup> Vano nto kaarowa okhalana Ettiminku yeela, vano nto khusuwela wira ohiy’ula waari ohiyu wa ekomunyawu, tivo kihiya Ettiminku ila. Okhala wira, ni atthu anci-ene, khivanweryaneya waakhela ekomunyawu voowiitthyaaleya, vano nakhalanaru ekereja yuulupale saana ninoowerya.

<sup>14</sup> Vano, nookhalana Mukhulupale onoorwa. E...oh, moosuwela enihimya’aka, enoovahiaru emusi Hickerson woohikhala khalayi. Ni munn’ihu okhanle napiyaano, owo arwe anivahe erumihelo vakhani vapiyaanoni, ya “Mwaaruuhe,” xontte, wala nsipo nlo naamukhaani ntoko siiso. Mwaamulopwana ola mwa emusi Hickerson, ohireere owehereriwa okathi munci-ene, oophiya. Mwammiravo mmosa ooreera murima, ni owo vekeekhai nniya wa aHickerson. Ni awo othene maniya wa hiyo, hiyo ninnaaphenta ni awo vekeekhai ti munn’ihu mulopwana ni muthiyana. Ninnixukhuru okhalana mwaamukhaani ola oyariwa vattthokoni vaya, yeeyo tthiri eruuhale murukunuxo mw’emusini. Ni etthune, tiithi ni amaama omuruuha mwanamwan’ola vano wira ovahereriwe. Vano, Yoolempwa enihimya wira, “Awo yaanaaruha anamwane

wa Yoowo, axikhaani, wira Owo owiixaatherye matata Awe ni aareerihe.”

<sup>15</sup> Vano, aakhala atthu molumwenkuni anaamini ele anihanaaya “opatiiso w’anamwane.” Nto, eyo ti wii, awo anaakuxa axinamwane ala ni khanaapatisa nnakhala, okhala wira, awo anaamiserya maasi paahi. Vano, hiyo khanimphwanya eyo hata nipuro mBibiliani, vaavo otonko aya omiseriwa mutthu, aalweene, hata anamwane.

<sup>16</sup> Nto siiso opatiiso ohimya wira muteko wa mahala wa muhina woovariwa. Ni anamwane axikhaani khansuwela etampi. Tivo, okathi Yesu okhwiyaawe vamwiikimanyo, Owo okhwiye wira attipihe itampi sa molumwenkuni. Ni okathi mwaana onkhalaawe mutthu, ni oniyariwaawe molumwenkuni mu, awo kharina hata etampi ya yaawo, tivo awo kharina orukunxa murima wira wiiriwe. Masi, okathi eyo, Ephome ya Yesu Kristu enikumihaaya etampi iyo. Vekeekhai, mwaana oniyariwa mutampini, onipakiwa mwa sootakhala, onrwa mulaponi oothaka, ni awo anatampii v’ephattu, masi Ephome ya Yesu Kristu ennittipiha eyo. Masi okathi mwaana oniphiyeryaawe munnuwelo w’osuwela etthu, ni onsuwelaawe eri yooreera ni yootakhala, vano ohaana orukunxa murima mwaha w’etthu iiralyaawe. Eyo etampii vano etampii siiso ntoko siniyariwaawe mutampini, eyo etampi ya mutthu, etampi vano etampi Atamu ni Hawa yiiranse aya; ni eyo yookumihiwa ni Muluku, ni Ephome ya Yesu Kristu. Vano mwaana khorina itampi wira arukunxe murima mpakha owo wira etampi, vano ohaana orukunxa murima. Munnona? Vano owo arukunxa murima, nto p’ukathi w’opatisiwa, vano nto owo ompatisiwa opwinihiwaka.

<sup>17</sup> Mpakha okathi yoowo, hiyo nintthara miixuttiho sa mBibiliani, wira, “Awo yaanaaruuha anamwane wa Yesu, wira Owo owiixaatherye matata Awe ni aareerihe.” Tithi ula oophenteya ohiy’ula onimuruuha mwaan’ola mwaamukhaani wa pastore ni miyo, wira ovahereriwe. Ni awo annoona wira emuhelaka mmatatani w’ale animuthoonyerya Kristu, animuhela mmatatani mwa Kristu. Vano, ni waamini, hiyo nimmuroiha mwaana wa Muluku, wira nixukhuru mwaha wo omuruuha va, ni onvekela Muluku wira amureerihe, yeeyo enihanaahu “waavehererya axikhaani.”

<sup>18</sup> Vano, moosuwela moota kaarowaaka waakhapelela an’aka. Kookhalana mwanamwane mwaamuthiyana Moovuwani ohiy’ula, ni owo aahivahereriwa w’Apwiya, vaava waltaari. Kookhalana mwammiravo ni mwaaruusi akilaathanse ottuli iwe, ohiy’ula, ahipatisiwe nlelo. Mmosa, muloko n’emosa, miyo kaalavula ni yoowo yeeyo olelo, Saara, ya opatiiso. Ni Yosefe orina mithanu ni miili paahi, tivo owo khoreere oyeve wa yeeyo nlelo, mpakha... Owo aathunne-ru, ni ohimya wira Muluku t’ohenle eyo vamurimani vawe, miyo kaamwiira nto. Masi,

ntoko axikhaani, miyo kinaavahererya w'Apwiya paahi, okhala wira owo mwiixuttitho wa Soolempwa wa yeeyo.

<sup>19</sup> Munna Neville, murowe ni miyo vano mpakha mmirav'ola ooreera. Miyo kaamoova wira . . . Ti Hollin? Hollin? Ayo, Hollin, Junior. Stephen Hollin. Ahe, ti yooreera. Oh, koono wira aamurupa. Eyo ti ephattu ya aHickerson, etthu yiiraneyaka. Miyo kaahimoono nihiku nlo, miyo khwira "Mukhulupale," ni sikina. Ni, vekeekhai, eyo yaari ekhaanixa wa yoowo, moone, olavula sa yoowo ntoko "Mukhulupale." Ehaali anyu? Ahe, koosuwela wira ola muhakhu wa khula maama ooreera murima. Khimwaarowa wuupuwela siiso? Ooreera saana. Nto vano, Munna Hickerson mulopwana ni Munna Hickerson muthiyana, ntoko murumeyi a Kristu, ntoko pastore anyu, kinimukuxa ttutthu ula, ni waamini, omuroiha mmoononi mwa Yesu Kristu, mwa Yoowo nyuwo munthunanyu omuhela mmiyoononi mw'Awe.

<sup>20</sup> Nrowe nuurame muru okathi pastore ni miyo ninkhalaahu va ni matat'ahu vasulu va mwaana.

<sup>21</sup> Tith'ihu a Wirimu, mBibiliani awo yaanaaruha wa Nyuwo axinamwane, wira Nyuwo nwiixaatherye matata ni wira mwaareerihe. Nto vekeekhai, Pwiya, awo yaanireerihiwa. Nto vano wira nitthare ethoonyeryo Anyu, itthu Nyuwo siiralyanyu, hiyo ninniphavela oratta-enexa, Pwiya, nimusomaka Bibilia ni nittharaka ethoonyeryo oratta-ene ntoko Nyuwo siiraly'anyu. Ni tiithi ula ni maama, Munna mulopwana ni Munna muthiyana Hickerson, awiixutti ahu oophenteya va mutapernakulu, anniniruhela mpantte ola mukhaani wo otthapa Nyuwo mwaannyalyaanyu wira ekhapelele. Onikhuma wa Nyuwo, Pwiya. Nyuwo muhaavaha mwaan'ola. Nto vano awo anthuna evahererye ekumi awe yaamukhaani wa Nyuwo, wira ekhale yo woorumeelani Nyuwo. Miyo kinvekela wira Nyuwo mmureerihe mwaan'ola, wira Nyuwo munvahe ekumi yoolekela. Okhale, vaweryaneya vale, wira oone Orwa w'Apwiya. Kinvekela wira Nyuwo mmureerihe khula nipuro oryaawe. Oleliwe vatthokoni va oKristu, tthiri oyariwe mwa emosa. Ni otthikele etthoko yeela. Atithi awe n'ame awe ekhale mpakha emoone mwaana vapulpitu, vaweryaneya vale, alaleyaka Ehapari yooreera. Awo anamputi omoonno siiso, Tithi, ohikhanle ve—veehiceni ya Empa Yootteela, wala nipuro pi nipuro nikina, okhala wira awo arumeyi Anyu, ni anthuna wira ekumi ya mwaana ekhale yoovahereriwa ni eparakha wa muteko wa Muluku.

<sup>22</sup> Vano miyo kinvekela, Tithi, wira Nyuwo mmureerihe mwaan'ola. Ni wira mahala a Muluku emurweele, ni akhalene ekumi ni oohakalala ekumi awe yothene. Ni wira atiithi ni ame awe akhale wira amoone wunnuwa, ninnivekela-tho. Mmureerihe hiyo ommureerihaahu mwa Nsina Nanyu.

<sup>23</sup> Nto vano, Stephen Hollin Hickerson mwaamukhaani,

kinnoovahereryani wa Yesu Kristu, wira iparakhha hiyo nivekenlyaahu soorweeleni. Mukhale mukumi ni a ikuru, mwamunn'aka, ni wira mukhale wira munvuwihe Muluku. Mwa Nsina na Yesu Kristu hiyo ninnivekela. Amen.

Muluku ooreeriheni. Muluku ooreeriheni nyuwo othene. Mwaana ooreera saana.

Weiwo ohinrowaahu wuuluvala, nnakhala  
wuuluvala,  
Muttetthe ohinrowaahu okhalakhala  
nuuluvalaka;  
Nnakhala wuuluvala, nnakhala wuuluvala,  
Muttetthe ohinrowaahu okhalakhala  
nuuluvalaka.

<sup>24</sup> Khenrowa okhala yooreeraxa? Amiravo anrowa okhala atokweene, ni atokweene okhala amiravo. Vano, eyo kahi yooreeraxa? Ni hiyo khaninrowa okhalakhala niwereiwaka, wala nnakhala oxanka, wala nnakhala okhwa.

<sup>25</sup> Vano, miteko s'okokhorela, Munna Neville oohimya. Ni miyo kintthuna kihimye, vano, wira muthukuman'owo, muhiliyale, ni mithukumano owo ohimyyaawe. Nave-tho, Muhano Ford yoowo aarwaaka okereja miyaakha sivinre, kinoomala-ru omuroiha na mwan'awe muthiyana, mahiku vakhani avinre, vano owo orina miyaakha miloko mithanu na miraru, ni oorowa okumana n'Apwiya nsana ohiyu ewoora yaneethanu na tthaaru, wona waka. Ni miteko s'onvitha, pastore ni miyo ninrowa ovara okapela ya miteko s'ovitha Coots Namararu, ewoora yanamuloko—ewoora ya namuloko ni minuutu miloko miraru, Namararu ila enrwa. Muhano Ford, Muhano . . . Kinoona wira kooliyala exeeni yawawe . . . Levi, Muhano Levi Ford. Awihu . . . Owo ti—owo ti mai a Lloyd Ford munimoonaanyu muliivuruni mwaka, wira aarowa okisukerya yoowara ele ya Xikuteero, ni ohanle mwetto mmosa paahi. Vano, owo ti—owo ti mai awe mmirav'owo. Tivo miyo kaahimukuxa nihiku nlo khuvekela ni yoowo, mutokweene owo oohaawaseya. Vano owo oorowa okumana n'Apwiya Yesu.

<sup>26</sup> Vano, Apwiya yatthuna vale, kaahikhalana etthu va wira kihimye wira miteko s'okokhorela, sakhala sa esumana enrwa, kaahenle-ene va, wala mano kuupuwenle wira kaahihela, ya etthu kaarowaaka olavula mwaha wa o—o—orwa, muteko onoorwa wa esumana enrwa. Vakhala wira miyo—miyo kinoona wira . . . Koona wira kaahihela muliivuruni mu, nkisuwenle sinto kaahihela wala nnari. Ayo, ela eri va. Apwiya yatthuna vale, Saapatu ohiyu kintthuna kilaleerye mwaha wa *Xeeni Mutthu Ovaraka murima Makhalelo A Mukina*. Nto Ttiminku voosiisu kintthuna kilaleerye *Omalitheriwa Wa Epiraamite*. Nto Ttiminku ohiyu kintthuna kilaleerye mwaha wa *Muhooleli Aka*, mwaha, *Muhooleli Aka*, wa Ettiminku ila enrwa ohiyu. Vano Apwiya

ereerihe itthu iyo ni ekikhaliherye, okhala wira nkaakhanle, ni yoohimya ekhaani paahi wira kilavule.

<sup>27</sup> Vano ohiy'ula, ninthuna naakuve noone itthu kamosa-kamosa. P'uhimya wene, kookhalana ewarakha va ena—enammaru orwa okureyu, Billy okunxaawe okathi vakhani ovinre, wira axinna kamosa-kamosa ari oMichigan, nto ela enikhuma wa asosiyasawu ministeriyaale wira sinnikhala itthu sinci-ene. Ti yeeyo enikhaliha itthu sootikiniha, moone. Wira, awo anihimya va wira axinna kamosa-kamosa wu yaahimya wira miyo kirimwaaruma iwe, vano awo anlaleya wira alopwana yaahaana waahiya axaar'aya n'umphavela muxirikha aya a murohoni, ni wira—wira miyo ka oohivonya voomalela. Wira khiyaavo etthu. . . Ni, oh, itthu imosa-imosa soowoopiha sitonko wiiwiwa. Nto asosiyasawu ministeriyale khusuwela eyo, nto awo ankilepela ewarakha mwaha wa yeeyo, ni wira miyo kirimwaaruma wu ni enirruha manyakanyaku, manci-ene. Nto akina aya alaleeryaka ni ahimya wira mulopwana aahaana omuhiya mwaara *ola* arowe amuthele *ole*. Vano, ekerej'ela ennisuwela wira hiyo khinneemererya ethiru siiso.

<sup>28</sup> Hiyo ninnimwaamini Bibilia. Hiyo ninaamini wira mulopwana amukuxa muthiyana, owo ti mwaar'awe, nto okhwa paahi t'onwerya waavalaaniha. Yeeyo paahi. Hiyo khinnaamini itthu siiso. Hiyo khinnaamini ophenta wootaphuwa, nave. Hiyo khinnaamini itthu iyo. Hiyo vekeekhai nimmwaamini Bibilia, nto Yoowo paahi. Tivo kinrowa olepa-tho, okopa ewarakha ela, ni kihimye yowaakhula aka kilaleerye murevistani, nto eyo—eyo enoolakiherya. Kinroromela wira enoolakiherya, khula enamuna, owaakhula awo.

<sup>29</sup> Vano ohiy'ula, nihinatthi okhunla Yoolempwa, nrowe nilavule n'Apwiya ahu.

<sup>30</sup> Tith'ihu a Wirimu, ninaattamela Veehiceni Vanyu va omoriwa ikharari, mwa Nsina na Pwiya Yesu, Ole muulupale aakhurunwe Movuwani wira anisuwelihe eyaattelo sa mihakhu sa Muluku. Moota onooxukhuru-ahuni Nyuwo mwaha wa Yesu ula muulupale Yoowo aari wiisooniherya wa Muluku, oowiikhaliha omutthu wa hiyo, ni mwa Yoowo nookhalana woopoliwa mwa itampi sahu. Nto hiyo vano noovira mookhwaani khuphwanya Ekumi, okhala wira ninnimwaamini Yoowo. Maana yoolempwa sa Yoowo, wira Owo oohimya, "Ole oniiwa Masu Aka ni onimwaamini Ole okirumme, ookhalana Ekumi ehinimala; ni kharrowa olamuliwa, masi oovira mookhwaani khuphwanya Ekumi."

<sup>31</sup> Mureerihe Masu Anyu, ohiy'ula, Pwiya. Ni hiyo nri va wira naakhele ekomunyawu mwa okathi vakhani. aKristu, anammuttettheni a Omwene anoothukumana waltaari, nto vaavo awo anrowa waakhela ele enihanaahu "ekomunyawu," e—epante yaamukhaani ya—ya esakramento Nyuwo

munihiyenryaanyu, wira nooniherye wira ninnaamini wira Nyuwo mookhwela itampi sahu, khuhihimuwa mmurotoni mwaya, ni mwa mukumi voohimala-tho, ni niiraka yeela mpakha Nyuwo otthika, voolikana ni Soolempwa ntoko sinirummwaahu. Mureerihe mirima sahu mwa miyuupuwelo sootakhala ni sothene siiralyaahu saari soovirikana ni otthuna Wanyu wuulupale. Tithi, munilevelele, ni munivahe mahala Anyu ohiy'ula. Munikawele vano Yolya y'Ekumi, mwa Masu, okathi onsomaahu ni olavula Yaawo. Mwa Nsina na Pwiya Yesu, hiyo ninnivekela. Amen.

<sup>32</sup> Vano Muliivuruni mwa Wiisuupulula, opacerya eversiikulu emosa paahi, kintthuna kisome eversiikulu 20, ahiiso versiikulu 1 ya kapiitulu 20.

*Vano kaahoona nlaikha naakhuruwa wirimu, naarino ehulelo ya nlitti noowiixa n'ekwirinti yuulupale mmatatani mwaya.*

<sup>33</sup> Vano miyo kaatthuna kilavule, vaakhanle, vaakhanle wira kaarowa wiihana yoosoma mwa yeela, wala okumiha enihimyaaya mwa yoosoma ela, mwa minuutu miloko miili wala miloko miili ni mithanu sinttharelana, kaatthuna kiihane, *Ehulelo Ya Mukhora*. Vano, miyo nkinthuna wi-wiihana "ihulelo," okhala wira Petru ohaakhela "ihulelo sa Momweneni." Masi kintthuna kiihane ela: *Ehulelo Ya Mukhora*. Vano nto naanaanoru nuumala yeela, kintthuna kihimye moolumo vakhani mwaha wa ekomunyawu, nihinatthi waakhela ohiy'ula.

<sup>34</sup> Vano, ehulelo. Miyo kinniweha va okathi onsomaahu, wira Nlaikha nla naakhurunwe okhuma Wirimu, nirina ehulelo mmatatani mwaya. Kookupali wira ti Wiisuupulula 13 wala 19, ninniphwanya-tho, Nlaikha nikina nirwaaka ni ehulelo. Nto ehulelo ti, yoothuneya ya ehulelo, eri wira ehuleke etthu, etthu ewaliwe, wala etthu yaari wira ewaliwe. Masi ehulelo envaheriwa niwoko nenlo.

<sup>35</sup> Vano, sookhala mithinto sinci-ene sa ihulelo, okhala wira nihaana irumeelelo sinci-ene sa ihulelo. Sookhala ihulelo sa mapuro oosuka-mo. Yookhala ehulelo ya empa anyu yeenyu, yookhala ehulelo ya ekaaro. Ni hiyo niniitthana ihulelo, nave iyo ihuleloo. Ni sinooweryaneya opakiwa vanli, imaara sinci-ene. Wala ya empa, sookhala imaara sikina sikhanyaaya opakiwaka, ele eniihanaahu, ehulelo ekhulupale. Mwa moolumo makina, eyo ehulelo empakiwa ni ivenxeryo, sinvara muteko mwa yeeyo, e-enrukunxa ewalelo mwa enamuna emosa ni enniwerya ohalela ohula khula mukhora, eniitthaniwa "ehulelo ekhulupale." Epakeliwo ya mukhalelo wa ihulelo sinci-ene, ni enooweryaneya ohuliwa siiso, ni mampa ahu wala hata ikaaro sahu, vanniweryaneya opakiwa ya napiili. Ni nto yookhala . . .

<sup>36</sup> Khiyaavo ehulelo enwerya ohula hata mukhora mpakha erumeeliwe ni ntata. Ehaana okhalana etthu wira erumeele



ehulelo. Ehulelo meekhaaya khenwerya wiirumeela. Ehaana okhalana etthu wira erumeele ehulelo.

<sup>37</sup> Eri ntoko mikorofooni ula ki—kinlavulaaka-mo. Mikorofooni ula khonlavula. Vooikhala wira yookhala etthu enlavula mwa yoowo, khonwerya olavula mmansaya. Ohaana okhalana etthu wira elavule mwa yoowo. Vano, kahiyo mikorofooni, nlo ti nsu wala o—onyakula (ottuli) mikorofooni onsuwelihaaya ni—niwipi n'osulu, okela munaaruni mwanyu.

<sup>38</sup> Vano, ti siiso ery'aya mwa olaleya Ehapari yooreera. Khanihyio hiyo mmansihu, ntoko arumeyi, hiyo khanihyio Ehapari yooreera. Masi hiyo n'anamasuweliha paahi ninlaleerya Nsu na Muluku mwa okhala wahu eriyari, wa mutthu, wa ole oniwa.

<sup>39</sup> Yoowoona ti enamuna emosaru. Miyo nkinsuwela etthu yoohimyeerya ekereja okathi ula vanihimya yoowoona. Masi Erooho Yoowaarya yakooniharu, toko, yoowoona, vano kinoomusuweliha yoowoona eyo ole oniroiheliwa. Tivo khayaari yawaka, miyo, yoowoona nkaari miyo, miyo. Aari Muluku aavanhe yoowoona, nto miyo kaavanre muteko ntoko namasuweliha, wira kaaruhele mutthaka wa yoowoona atthu.

<sup>40</sup> Vano, ehulelo etthu emosaru. Kileveleliwe. Ehulelo ehaana ovareleliwa paahi ni ntata ninhula mukhora. Moone, nihaana okhala ntata. Vano, nto ehulelo enrowaaka olavula ohiy'ula, niri ntata nimosa paahi ninwerya ovarelela ehulelo ela, nto nlo ti ntata na waamini. Eyo t'itthu emosa paahi enwerya—enwerya ovarelela ehulelo ela. Ni matata annivarelela ihulelo ikina, ni nintthuneya ntata na waamini wa yeeyo.

<sup>41</sup> Vano, hiyo ninkuxa ntoko ehulelo ya osuwela. Vano, mutthu ohaana, vakhala wira omphavela othukumanya osuwela, moone, vano, yookhala ehulelo wa yeeyo. Yookhala enamuna mutthu ola orinaawe ohulaka. Owo ohaana okhala . . . wira ophwanye iliivuru sawe ni wiixutta wawe, ni owo khokhanle . . . khaavo okhanle wiixuttaka nipuro nawe. Pooti wiixuttihiwa, masi owo ohaana wiixutta. Nto enamuna emosa paahi ekhanlyaaya wiiriwaka, owo ohaana ophwanya ehulelo eyo, wira etthu vale enuupulula wala en- . . . enoomuupululela osuwela owo omphavelaawe.

<sup>42</sup> Ni aakhala atthu amphavela orumiha epiyaano, ni awo . . . wala muusika. Awo khansuwela saana moota wo wira eyo, masi yaamuwerya orowa wu nto muxuttiha ovaha nisomi nnisomi, nave awo khayaakhalakhala yiixuttaka. Awo khanwerya paahi ovarelela ehulelo eyo ya esiiri iyo, moota erumelo ni sinruma sa ekokhelo ni siiso oruma namalwe. Entthuneya ehulelo.

<sup>43</sup> Ni matemaatika, yookhala ehulelo ya matemaatika, murinaanyu ovaraka enamuna aya. Koowoona atthu yaawerya okuxa ithataanelo xexe sa mammeru, ni ohela ikatha saya, khula emosa wa ikatha saya mw'ethataanelo emosa ya mammeru,

ni yaamukhuruwela *saale* khino mammeru mathanu wala mathanu na mosa voowiixa, ni ohela yooawaakhula aya vathi. Yaalikelaka ithataanelo xexe khula okathi, khula nipuro okhuma emosa mpakha thanu na xexe. Ahe, vannikirikela waalikelaka ethataanelo emosa, vooikhala wira kirina ikatha soophiyerya mmatatani ni munawoni wira kaalikele, wira—wira kaalikele ethataanelo emosa. Nkinaweryeke ophwanya ehulelo eyo. Masi, moone, akina aakhalana ehulelo ya yeeyo, awo annisuwela moota wo wira.

<sup>44</sup> Ni yookhala ehulelo ya osuwela, mutthu onaavya osuwela. Yookhala ehulelo ya siyensiya, othokosa wa siyensiya. Vano, yookhala, eyo ehulelo yuulupale. Atthu anniphavela ehulelo eyo.

<sup>45</sup> Ntoko nno okathi vakhani ovinre awo yaahimphwanya aatomu, ni yaahisuwela wira yaahikhala aatomu, ni wira aatomu yaapaka imoleekula ni siiso. Vano, awo khupacerya othokosa, ookhala aamini wira vakhala wira aatomu owo aakhalaha sothene vamosa, aatomu owo aarukunxiwe, yaamukumiha ele yaamuvarelela ni yaamumpwexakasa. Okhala wira, itthu sothene sinlipihiwa ni aatomu, hiyo noosuwela eyo. Vano, nipotto nle ninlipihiwa ni aatomu. Nyuwo munkhala mpurukuma mwaha wa aatomu. Malaxi, miri, itthu sothene sinkhalihwa vamosa ni aatomu. Ahe, aatomu owo, orukunxelaka sothene epantte emosa, vaaweryaneya opwexakasiwa ni orukunxiwa, nto aamuhonona. Ni, vano, anasiyensiya aalupale yaamini wira eyo yaamuweryaneya wiiriwa, ni yaahivara muteko khuvava muteko, nto khukhala ewoora ti ewoora, ni esumana t'isumana, mwaakha ti mwaakha, mpakha vookiserya awo khuxintta.

<sup>46</sup> Aari, kookupali, Thomas Edison, mwaha wa muthuko, enihimmwa wira mulopwan'owo aahikhalana osuwela wira owerwe opaka muthuko ni eletrisitaate. Owo ti nampaka luuxu. Ni hata khaarowa orupa ohiyu. Owo aakuxa mukatthe mmatatani n'ukhuura ntoko yoolya awe, n'ukilaathi vale n'utthokelela n'uvara muteko. Nipuro nlo muhina saana mmuupuweloni mwawe, etthu yaanimuleela wira aamuwerya wira. Exeeni iyo? Ti ehulelo enwerya otthukula ephiro.

<sup>47</sup> Miyaakha woohikhala khalayi, aahikhala mu—mulopwana mmosa aamini wira aahikhalana erattelo wira olepeke ihantisi mwa etthu ya malootho maxexe. Owo aanaamini wira aahikhalana ehulelo mmatatani mw'awe. Vano owo atthuna. . . owo khurowa. . . Owo aakhala oKansas. Owo khurowa wa namatthitta exornaale yuulupale oKansas City, khukuxa soolepa sawe kamosa-kamosa. Nto namatthitta khwira, "Mulopwana, khamurina. Nyuwo, khivantthuneya weeherya, nyuwo—nyuwo khamunwerya." Masi eyo khiyaamusivenle. Owo aanisuwela wira aahikhalana. Vano owo aahitthika imaara sinci-ene, aphavelaka, masi owo (namatthitta) aanimukhootta. Vookiserya, owo khurowa mapuro makina, khukhoottiwa, yiiraka, "Mwenye, khamurina tu. Khamunwerya wira." Masi

nnakhala vo owo aanaamini wira aamuwerya wira. Nto ti siiso, owo ookhalana etthu mmatatani mwawe! Vookiserya, owo khuphwanya muteko wo olepa muttala mukhaani wa, kookupali, epaphelo ya ihapari wala etthu ya ekereja, muthinto mmosa wa sookhumela mmapaweni makhaani sa ekereja. Vano owo khurentteri nipuro nikhhaani noopwehiwa ikaaro nookhalana anawili wala makhule, vaavo makhule yatthimakasaaya mapuro othene ni sothene, mpapheloni mwawe, nto owo khupacerya woona omeekha wa nikhule nimosa nikhhaani. Ti vaavo epacenryaaya ehantisi ya Mickey Mouse. Vano Walt Disney namilyawu. Mwaha wa xeeni? Owo aahikhalana etthu mmatatani mwawe, ni aanisuwela wira aanivarela, owo aanisuwela wira aamuwerya wira. Ni ti siiso khula oxintta wuulupale omphwanywaaya. Okathi alopwana n'athiyana ankhalaaya etthu mmatatani mwaya, ansuwelaaya wira anoowerya.

<sup>48</sup> Okathi esupiyaani yaamwarenlyaaya mulaponi. Okhala wira, othene vano ninrummwa omwaakhela mwaapomphe, wira emalamalihiwe. Okathi esupiyaani emwareiyaaya... Nsana kaamwiwa meetiku mmosa okathi weettihaaka ekaaro muramphani, meetiku mmosa a oLouisville. Owo khwira, "Miyaakha vakhani sivinre, okathi ehasara yuulupale yaakhumelenlyaaya oLouisville," khwira, "vaakhanle wira atthu yaaheemela kaaryaaka-vo, ni khoona ikaruma s'omumula-no miloko mithanu ni thanu na piili, ni alopwana, athiyana, amiravo n'aximwali, oorakalihiwa ni eretta enihaniwa 'esupiyaani,' ni khiyaakhanle etthu yaaweryaneya wiiriwa." Khwira, "Miyonkintthuna-tho woona etthu siisaale."

<sup>49</sup> Masi siyensiya aahuupuwela, "Yaakhanle-ene etthu yootakhala ntoko esupiyaani, vekeekhai yookhala etthu wira ewane-no." Awo yaahiwana, yaahikhala mphironi ni ipoota, anamattipiha mooro ale, yaahirula ixapheyo, yaahiveka, yaahixonttela, yaahiira sothene, ephavelaka ophwanya ehulelo wira ehule mukhora wa otaphuwa. Nto, vookiserya, mulopwana mmosa muKristu aaitthaniwa Salk khumphwany mwaapomphe. Mwaha wa xeeni? Yaahikhala etthu yootakhala vapuwani, aahikhala namwiwa vapuwani; yaahikhala ehulelo nipuro nlo yaawerya waahulela-tho otaphuwa atthu, nto mwaapomphe Salk waari oloola wuulupale. Oh, etthu ehulelo ekhanlyaaya wiiraka! Mwaapomphe khupakiwa, nto vano enoomalamalihiwa esupiyaani ni mwaapomphe yoola, okhala wira waari mwaha wa "ohikhalakhala ekhulumuwaka ni ohikhalakhala ehiyaka," ehulelo ele yaari nipuro nlo. Yaahikhala etthu yaarowa waakiha evirikanyaka yeeyo, ni awo yaahitthunaxa ophwanya.

<sup>50</sup> Nto yakhala yootakhala emosa ntoko esupiyaani, owereya vammilo, ettuvi, ettekuxa ya ncano, teetanu, wuuma eyano, ni sikina, siyensiya onweryaawe, owanana, sootakhala iya,

othana n’uhiyu, mpakha animphwannyaaya mwaapomphe a seiyo, okhala wira ti yootakhala, namwiiva, khivatempe okhala ehulelo ya woopowa wa mutthu ori mukalapooso mwa etampi? Yookhala ehulelo ya mukhor’owo, wira yaataphule atthu mwa yeeyo.

<sup>51</sup> Ehulelo, voolimaleleya, yaarukunxaka ewalelo, ni, mwaphwanya vale ehulelo, ehaana okhala ya muhakhu khata, etthu eniphwanelela, ahiiso khimwaarowa hata owalela. Yaahiphwaneleleke owalela, muhiye paahi. Masi yaaphwanelelaka owalela! Vano ehulelo voolimaleleya e—ethoonyeryo ya etthu, wala enamuna y’okela mwa etthu emphwanelela. Ehulelo, ti yeeyo ekhalenly’aya, vano, eyo entthukula etthu eniphwanelela.

<sup>52</sup> Vano noosoma mwa Yohani Oowaarya, kapiitulu 10, Yesu ohimnye wira, “Miyo ka Mukhora wa munikhomani. Miyo ka Mukhora,” kahi mukhora *khata*, “*ka* Mukhora, Mukhora mmosa paahi. Miyo k’Ephiro, Ephiro emosa paahi, Ekeekhai, ni Ekumi, ni khaavo onrwa wa Atithi ohivinre wa Miyo. Miyo ka Mukhora wa munikhomani ni othene ale anoorwa Miyo kihinatthi awanani, anawiiye ni alavilavi.” Owo ti Mukhora wa munikhomani. Owo ti Mukhora wa woopowa.

<sup>53</sup> “Khanivo nsina nikina nivaheriwe vathi v’Erimu mukhanly’anyu woopowaka, mwa Nsina na Yesu Kristu paahi.” Hata ekereja, hata muromolelo, hata eyaaminelo, hata miixuttiho sa etthu p’itthu; mwa Nsina na Yesu paahi. Eyo ti—eyo ti Ehulelo. Khivanxankiha Petru vaaweryaawe orumeela emosa aya Nihiku na Pentekosite! Awo yaatthuna osuwela moota w’ovolowa Mukhor’ole. Owo aarumeenle Ehulelo. Ni eri Ehulelo emosa paahi, okhala wira ori Mukhora mmosa paahi. “Miyo ka Mukhora.” Vano Petru aahikhalana Ehulelo wa Yoowo. Nto owo khwira, “Murukunuxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe itampi sanyu, nto munimwaakhela mihakhu sa Muluku.” Ti Ehulelo ya Mukhora, ni Yesu ti Mukhora.

Ori Mukhora mmosa paahi wo ovoniha, ni Yesu ti Mukhora yoowo.

<sup>54</sup> Ori Mukhora mmosa paahi wa murettele. Ayo. “Murettele aka kinnoovahani.” Owo Mukhora mmosa paahi wa murettele wooloka. Khino munuupuwela wira mookhalana murettele. Nyuwo pooti othukumanya musurukhu woophiyerya othuma empa anyu, pooti othukumanya musurukhu woophiyerya wira mwaathumele ikuwo an’inyu, okhalana yoolya wira mulye, masi nyuwo pooti othukumanya osuweliwa woophiyerya wira mukhale oosuweliwa eriyari y’atthu. Masi mwaarulaka ixapattho sanyu ohiyu munailikanyiha wira mummaathi, eri Etthu Emosa paahi enwerya woovahani murettele. Eyo ti wii, mwaasuwenle wira mwaamookhwa ohiyu yoowo, ori Murettele

mmosa paahi, nto, eyo ti, Yesu ti Murettele. Owo ti Murettele ahu.

<sup>55</sup> Owo ti Ovonihiwa wahu. “Miyó k’Apwiya Muluku anyu kinvoniha iretta sanyu sothene.”

<sup>56</sup> Owo ti Mukhora wa Wirimu. Ni khiwaavo hata mukhora mukina wala hata enamuna ekina woohikhala mwa Yesu Kristu. Owo ti Mukhora wa Wirimu.

<sup>57</sup> Nto vano Yesu ti Mukhora wa itthu iya sothene, nto waamini ti ehulelo enihula Mukhora. Vano, vakhala wira Yesu ti Mukhora wa anatiri ala othene a Muluku, waamini muteko Awe omalihiwe onnihula khula mukhora wa khula muhaku ori muhina mwa Omwene wa Muluku. Munniwa? Ehulelo ti. . . Waamini ti ehulelo emmutthukula khula natiri Owo onimuhimyaawe. Ehulelo ya waamini enniira yeeyo, waamini muteko Awe omalihiwe. Ti ihulelo seiya hiyo ninlavulaahu.

<sup>58</sup> Vano mw’aHeperi, kapiitulu 11, kookhalana elista yuulupale alempwe va, ya oowivaha ala a waamini. Yaari ehulelo, ya—ya Mukhora, yaamaalinhe eyano ya amwatto. Yaari ehulelo, waamini, yaahunle ikhatteya. Waari waamini, ehulelo ya waamini, yaattipinhe owali wa mooro, waatthyanwe orere wa xoowa, waahihimuxale alipa-ookhwa. Waari waamini, ehulelo ya omwaamini Muluku mukumi. Ntata nle, mulopwan’ole, muthiyan’ole, onwerya okuxa ehulelo ele ya waamini, awo anoowerya omutthukula khula natiri Muluku omuhimyaawe. Masi mwaahikhalane ehulelo eyo, nyuwo munimwaakanyerya paahi, khimunrowa ohula. Munookumulana ni yeeyo, okhala wira ehulelo ela. . .

<sup>59</sup> Khula ehulelo yoopakiwa oratteene yookhalana ivenxeryo muhina mwa ewalelo, ni entthuneya enamuna khata, ni epakeliwo khata ya ihulelo iyo wira erukunxeke ivenxeryo iyo. Nto evenxenrye emosa ekhaani yoosusa, enootepanya ethu yothene.

<sup>60</sup> Tivo, miyo kinnaamini Ehapari yooreera yoomalela, Masu othene a Muluku, ankumiherya owerya wa Muluku, anruuhela iparakha Sawe wa athu. Ti ehulelo ya Mukhora, eyo enihula Yoowo. Oh, athu awo oowivaha aalupale, maprofeta ale ni athu aalupale a mBibiliani, yaawo yaarina ehulelo eyo! Mwaha wa yeeyo awo yaawery’aya omaaliha iyano sa amwatto, ottipiha owali wa mooro, otthiawa orere wa xoowa, waahihimuxa alipa-ookhwa, ni opaka inamuna sothene sa miiriirya, okhala wira awo yaavarelela ehulelo eyo ni yaanisuwela wira yaanivara muteko, okhala wira yaari ehulelo yooyariwa ni Soolempwa.

<sup>61</sup> Vano, kaalevaka ni ehulelo ya eyaaminelo, nkinsuwela ethu enrowaaya wira. Awo yahimya wira “ekerej’aka eniixuttiha *ela*,” miyo nkinsuwela ya yeeyo.

<sup>62</sup> Masi Bibilia aaxuttihaka, nto miyo kinakhalana ehulelo ya waamini mmatatani mwaka, wala mmurimani mwaka, enihimya

wira “awo Masu a Muluku,” eyo enoottipiha owali wa mooro, enimwaatthukulela ovonihiwa aretta, enimwaatthukulela woopowa ale oorimeela. Kihaana orwa mpakha Vamukhora, sothene ti mwa Nsina Nawe. “Sothene muniiraanyu ni moolumo hata ni miteko, mwiireke sothene mwa Nsina Nawe.” Musuwelaka wira ehulelo erinaanyu waaminii, okhala wira eyo ehulelo yoopakiwa ni Soolempwa. Vano, yakhala ehulelo ya eyaaminelo, ehulelo ya muromolelo, nkisuwenle ethu enrowaaya wira. Masi yakhala ehulelo ya Soolempwa, enoohula, okhala wira Muluku ohimnye siiso. Vano, oh, khivanxankiha awo yaaweryaaya omaaliha owali wa mooro, ni siiso, awo yaarinasa ehulelo.

<sup>63</sup> Ettikinyeryo muru yoopacerya ya Muluku wa mmosa a maprofeta ale, khiivo yaawerya oweemexa. Owo khaarina wira ntoko sinikiirelaawe miyo imaara kamosa-kamosa, okhanyereryaka imaara sinci-ene, ni khino nyuwo (kinroromela wira nnari), masi onikhala akileelaka, “Murowe mwiire ela,” vano nto munoorowa nveveleyaka, “Vano murowe mwiire *ela*,” ni “Mutthike mwiire-tho, khamwiirale oratta-ene.” Ettikinyero muru emosa ekhaani paahi! Paahi, awo yaaniwerya woota Erooho waahimeerya, “Eyo ti ethu yo wira,” ni khiyaavo yaarowa oweemexa. Munna, awo—awo—awo yaahimaaliha iyano sa amwatto, yaahithyawasa orere wa xoowa, yaahittipiha mooro, awo yaahiira sothene. Ettikinyeryo muru ekhaani paahi ya Muluku, okhala wira awo yaanikhalana ehulelo mmatatani mwaya, waamini iwe wuulupale! Awo yaahimwiirela itthu Muluku okhala wira khiyaavo yaaweemexa. Oh, moota eryaaya yoovuwa!

<sup>64</sup> Ntoko mwammiravo emaara emosa aarwiiye wa munna mmosa mutokweene aari mulopwana ooreera murima a khalayi, profeta a khalayi a Muluku. Vano owo aanimwiiwaka mulopwan’ole ohimya onamoona voohihyererya, voohihyererya ahimiyaka oreera murima wa Muluku, ni moota Muluku aary’awe, ni ele Kristu aaryaawe, ni aanitthikela paahi, alavulaka. Vookiserya, mmirav’ola aarowa okhalihwa mulaleyi, vano owo khurwa wa musuweli ula mutokweene, nto owo khumwiirela, “Mwenye, kintthuna kookoheni ethu.”

Owo khwira, “Kohakani, mmiravo.”

<sup>65</sup> Owo khwira, “Kristu vekeekhai onnihimya ethu wa nyuwo vanci-ene ntoko sinihimyaanyu wira onnihimya?”

<sup>66</sup> Owo khwira, “Owo onnihimyaxa ethu wa miyo ovikana kaarowaaka owerya okhalana iphumu wira kilavule!” Eyo eri vo. Yaari exeeni iyo? Owo aahiphwanya ehulelo.

<sup>67</sup> Mmirav’ole khuhimya, ya yeeyo, “Nyuwo mwaahimiyaka itthu iya, ni munakileela wira iyo ti s’eeekhaixa ntoko nyuwo, weeso kintthuna kimusuwele Yesu yoowo mmosaru, mwa ekeekhai emosaru.” Yaari exeeni iyo? Owo aahisuwela wira

mutokweene ole aahikhalana ehulelo, owo aaweryaawe ohula ni owala.

<sup>68</sup> Moosuwela, ehulelo enwala, ennihula, nave. Munnona? Vanniweryaneya otaphula ni otthuka. Ti yeeyo. Ehulelo emosaru yeeyo enwala, ennihula. Ehulelo enihula, enniwerya owala. Ni ti siiso, moone, okhala wira ennivara muteko ipantte soopiili. Wooniha othunku okhala wira ekereja eroopweteiwa yoowoona aya ya yeeyo! Etthu xeeni yooxankiha yaary'aya okathi ekereja yitumihalyaaya mwa iyaminelo, ntoko siiralyaahu olelo, nto vano enimwiiana wira yiiraane.

<sup>69</sup> Nihoona vatthu etthokiheryo yuulupale ya oruma w'oRooma ni akina anrowaaya okumana vano, anrowa orukunxa ipokrama kamosa-kamosa. Miyo koono wira awo khiyaarukunuwa; masi awo anoorowa orukunxa, khula enamuna, onvaha khula namukuttho owerya wa paapa, ni—ni khula nipuro oryaawe, ni sikina. Wooniha othunku, ekereja yitumihalyaaya mwa makano ohiya Masu. Munnona? Ti vaavo awo ahiyalyaaya ehulelo, vaavo vo. Mwaha wa yeeyo miiriiry suulupale ni ithoonyeryo sihinipakiwaaya eriyari y'atthu olelo, saakhalaka khalayi, awo ehaarimeela ehulelo! Ayo, awo annisuwela Mukhora, awo annisuwela wira Mukhora ori vale, masi etthu enttharelana ti ehulelo wira ehule Mukhora. Mihakhu siri wiithela wa Mukhora. Siroowaleliwa, voohooneya wa mulipa-oohaamini. Masi mulipa-oowaamini, orina waamini ni onwerya okuxa ehulelo ya waamini, onniwerya ohula Mikhora iya. Ayo, mulopwana.

<sup>70</sup> Emaara emosa nno iyaakha vakhani sivinre, aahikhala munna mmosa misiyonaariyu, nto owo aahoona wira aahikhalana wiianiwa orowa wAfrika. Owo aari mmiravo; mwaara mmosa ni anamwane anli, ooreera saana, axithiyana, oophiyaka iyaakha thanu na piili wala thanu na ttharu, khula mmosa. Nto mmirav'ola khaawerya ohiya wuupuwela eyo. Owo aari mu—murumeyi, owo aahikhalana ekereja yooreera mulaponi. Masi khaawerya otthyawa wiianiwa iwo, owo “aahaana orowa wAfrika.” Vano owo aahivekela, othana n'uhiyu. Owo khaatthuna orowa. Vano Muluku aanitthikela alavulaka ni yoowo, “Nyuwo muhaana orowa!” Nto vookiserya owo khuphiyerya okathi, wo othanla, vaavo, owo—owo aarinaawe orowa!

<sup>71</sup> Vano owo khurowa wa makhulupale a misawu a ekereja wawe, nto khwira, “Muluku ookiihanela opuwani wa misawu mutakhwani wu wa—wa oRodesia.” Ni etakhwa ela ti yoosareya ettekuxa, ni ehooma, ni nsuwa nle nooviha, iretta ni maretta, ni inamuna sothene sa iretta mutakhwani mu, okhala weiwo owo aarowaawe opaka . . . oviriha ekumi awe yothene. Khutumiha empa awe ni sothene saarinaawe. Vano makhulupale a misawu yaatthuna omwehererya, nto awo khwira, “Mookupali vano?”

Owo khwira, “Miyo kookupali.”

72 Awo khumwiirela, “Mwenye, mootthokelela wira, muhaana aana axithiyana aili ooreera, ni muhaana mwa—mwaara mwali oophenteya, nto paahi muno. . . Muhinrowela-ni woona moota ery’aya vano nto mutthika?”

73 Owo khwira, “Nnari, Apwiya arookileela. Oh, ti y’ekeekhaixa!” Owo khwira, “Apwiya aakiihana. Ni miyo—miyo nkinthuna ohiya empa aka, nkinthuna ohiya ekerej’aka ni atthu aka, masi Apwiya akiitthanenle weiwe mutakhwani mmwe.”

74 Nto owo khwira, “Mulopwana, mwaanisuwela wira vanooweryaneya axiruusi anyu ophwanya eretta ya ettekuxa ya ncano wala ettekuxa ya maasi ooriipa, akhwe, ohiyu omosaru?” Ni owo khwaahimya atthu oohiyana-hiyana yaapweteiye aana aya, axikhaani, mwaha wo waaroiha weiwe, mwaha wa iretta awo yahaampchwannye aya mwaapomphe aya. Ni khwira, “Muupuwele maretta, amwaar’inyu ooreera ni axiruusi anli arina-ene maretta, ni nswa nle nooviha ni itthu murinaanyu ovilela.” Khwira, “Khamunoova, ni woopiha wo waaroiha an’inyu ni mwaar’inyu nipuro siiso?”

75 Nto misiyonaariyu khukhala vale, mmiravo, nto maithori khupacerya omora wiitho wawe, owo khurukunuwa, khwira, “Axinn’aka! Yoowoona aka ya wiithana wa Muluku,” owo khwira, “vakhala wira Muluku okiitthanenle wAfrika, an’aka ni amusi aka anookhala oolipaxa wAfrika ovikana khula nipuro molumwenkuni.” Amen. Yaari exeeni iyo? Owo aahikhalana ehulelo yo wiitthaniwa wawe, owo aahikhalana waamini wa etthu aahimyaawe. Oh, miyo kuupuwela, nuulumo xeeni n’ominyala! Okathi wiwaly’aka yeeyo emaara yoopacerya, murim’aka waahitupa. Moone, “Vakhala wira Muluku okiitthanenle wAfrika, an’aka mwa maretta ni eretta ni itthu sothene sikina, anookhala oolipaxa ovikana khula nipuro nikina elapo ya vathi.” Owo aahikhalana ehulelo. Ti yeeyo entthuneya.

76 Mwakhalanaru ehulelo, khokhanle woova, khokhanle ohoverya, khokhanle hata okoha. Khamurina omukohaka mutthu mukina mwaha wa yeeyo, nyuwo munnisuwela oratteene. Mookhalana mmatatani mwanyu, munnisuwela etthu yo wira. Amen. Munnisuwela ele ekhanle yookhumela, munnisuwela wira mukhora onoorowa ohuleya. Mooweha saana ivenxeryo ni moosuwela wira etthu yoolikanaxa, mukhora onoorowa ohuleya nyuwo mwahela-ru ehulelo mwa yoowo.

77 Oh, vaakhanle wira ekereja yaahikhalana ihulelo paahi! Vakhanle wira ekereja yaahikhalana ehulelo ya waamini paahi, naamuwerya ohula khula mukhora, khula eretta, khula ehasara, khula mwaha okhanle. Vaamuweryaneya ohuleliwa hiyo vaakhanle paahi wira naaniwerya okhalana ehulelo ela. Mulopwan’ola aahikhalana ehulelo yo wiitthaniwa wawe.



<sup>78</sup> Mwakitthuniherya onaamona wawaka. Kinnuupuwela mwa iyaakha soophiyaka muloko ni thanu, muloko ni thanu na piili sivinre vano, ntoko, okathi Apwiya yaakihimenryaaya ohitto iwe omuro, okathi Awo yaakhurunwaaya Munripui mmwe na Mooro Nenlo munoonanyu elatarato aya, vano Awo khulavula ni miyo khwira, “Nyuwo munooroiha Mutthak’ola mulaponi mothene.”

Ni kinnuupuwela oGreen’s Mill okathi Awo yaalavunlyaaya ni miyo.

<sup>79</sup> Vano miyo khurora khimuhimeerya pastore, vano owo khukileela, khwira, “Billy, mulyiye exeeni ohiyu ule? Mwaarina ettora.” Owo khwira, “Mutthikele muteko anyu. Nyuwo munvara muteko Mmutthenkesoni mwa Miteko sa Mmawaani, murina muteko wooreera, mutthike mwaxikhe i—itthu sanyu, mwan’aka.” Khwira, “Mwaarina ettora. Muhoolya etthu.” Eyo khiyaakoopopinhe hata vakhani!

<sup>80</sup> Vapacenryaaka miteko s’ovoniha, anci-ene a nyuwo va munnuupuwela Mutthaka aka voosiis’ule, *Ntoko Davidi Saaronwaawe Okumana ni Koliyathi*, kaalalenryaaka.

<sup>81</sup> Nto kileeliwa, owo khwira, “Nihiku na siyensiya a vano, okathi orinaahu inamuna sothene s’othokosa sa mameetiku, okathi orinaahu matothoro oosuwelexa, okathi ekereja eliyanyaya ovoniha wa Muluku khalayi ni itthu sa, iyaakha sinci-enexa khalayi, munrowa woonana sayi ni ookorosowa muulupale siiso? Munrowa okhuma sayi ohoolo w’aMetotista, aPatista, maPrespiteriyaano, n’akina, nave hata aPentekosite, ale aliyandle eyo okathi ovinre khalayi, khukela mwa iyaaminelo saya? Munrowa woonana sayi, muhirina muromolelo wala hat’etthu ekina wira yookhaliheryeni? Munrowa wira exeeni, Bill?” Mwa enamuna emosa, ekina, eyo khayaakoopopinhe hata vakhani, maana kaahikhalana ehulelo mmatatani! Miyo khwira... Awo khwira, “Khaavo onrowa owaaminini. Khamunrowa owerya wira. Khaavo onrowa owaaminini.”

<sup>82</sup> Miyo khwira, “Nkincala. Kookupali etthu emosa; Muluku orookiihana, ni kihaana orowa okhala wira Muluku orookiihana.” Miyo koovarelela ehulelo. Owo aahikiihana, Owo aahikooniherya, Owo aahikileela, ni kihoona Mukhalelo Awe okathi Owo okirumaly’awe, ni ehulelo yaari vaavale!

<sup>83</sup> Pastore khwira, “Ni osoma wa ekalaase ya neethanu na piili, ni munrowa olaleya ni ovekela ohoolo wa mamwene ni mapewe!”

Miyo khwira, “Eyo ti voolikana ni Masu Awe!”

<sup>84</sup> Okathi ntoko yoola mwaisana, wala esumana emosa wala piili khalayi, okathi waarwiiyaaka okereja va khooleelani wira Apwiya Muluku yaahikivaha yoowoona, yo orowa mukwaha wo oxaya, ni mwa—mwaamunama mmosa kaarowaaka omphwanya, aarowa okhalana manyaka a meeturu emosa ni isentiimeturu thanu na piili. Nto mphironi kitthikaka numala omuxaya mwaamunama ola (nipuro naarowaawe okhala, mukhalelo

waarowaawe okhala), mphironi kitthikaka kaarowa wiiva ekhaya yoottweelela. Nto miyo khurowa nipuro nimoso, ni kilavula ni mulopwan'owo, nto owo khwira, "Nkimmusuwela mwaamuna orina mukhalelo yoowo. Ni vanaasiwa ekhaya yoottweelela nkinatoko woona emosa."

Miyo khwira, "Masi ehaana okhala nno nipuro nlo."

<sup>85</sup> Siiso owo khwira, "Hata khaninrowa okela nipuro na ikhaya. Ninrowela ipwittipwitthi, osulu saana ommalela etakhwa." Ahe, miyo khurowa ni yoowo.

<sup>86</sup> Nto nihiku naneeli wu, nipuro nene nenlo, vaavo vene Apwiya yaahimyaaya, aaphwanyaneya mwaamunama. Tivo varonwaaka khimukuxa mwamunama, ni okathi waakumihaahu esapala, ni manyaka ni sikina, owo khwira, "Kintthuna kookoheni etthu. Mukileenle wira, mahiku mararu ottuli okathi okhumme ahu o—omaxaaxani, wira vamanlyaanyu omoopela mwaaxinama khata, wira mphironi mutthikaka 'mwaarowa wiiva ekhaya yoottweelela.'"

Miyo khwira, "Eyo ti SIISO ANIHIMYA T'APWIYA!"

<sup>87</sup> Khwira, "Miyo nkinihoverya," owo khwira, "okhala wira munn'aka aahikkhalana ecile, ni nyuwo mwiira muhinatoko omoona mookhalaru, okathi waary'anyu wenno emaara emosa, nto myuwo khukileela wira mmiravo ole aamurowa ovonihwiwa kaairale-ru etthu khata. Ni owo khuvonihwiwa." Owo khwira, "Vano, masi, Munna Branham, kintthuna kookoheni," owo khwira, "Kinniweya woona vathi mwaako ole iwe weiwo enipacerya etakhwa, ikhavalalo iye siryaaya-wo. Ni khiyaavo etthu iwe. Khaavo malaxi hata vakhani, khuwaavo hata mwala, khiyaavo etthu." Mirawa sa karibu, sirina isentiimeturu soophiyaka thanu orakama waya, vasulu vanimalela etakhwa, mwa ekilomo emosa ni nuusu vasulu va nipuro vanimalela etakhwa. Khwira, "Ekhaya enrowa okhala vayi?"

<sup>88</sup> Miyo khwira, "Muluku ti Yehova-yire. Vakhala wira Owo ookileela wira enookhala ekhaya iwe, enookhala-wo emosa iwe."

<sup>89</sup> Nikhuruwelaka mwaako, khula meeturu soophiyaka imiya thanu na ttharu, naattamaahu, owo aaira, "Munna Branham, woophiya okathi wa ekhaya eyo okhumela."

Miyo khwira, "Muhiivelavelihe, enookhala vaava."

<sup>90</sup> Nto okathi waaryaahu voohalaka imeeturu soophiyaka imiya thanu na nipuro ikhavalalo saary'aya, naahaana omumula-tho ni manyaka oolemela n'itthu ottuli wahu. Vano owo khuwehawe-ha-tho, nto miyo khoona wiitho wawe okathi aakiwehaawe, ntoko wira mmurimani mwawe aamwiikoha. Moone, owo *aaroromela* wira yaamukhala vaavale, masi khaarina ehulelo.

<sup>91</sup> Masi mwa enamuna emosa, ni mahala a Muluku, Owo khonavonyeke ni miyo. Okathi Owo aakihimenry'awe

wira yaamukhala ekhaya yoottweelela vale, kaahikhalana ehulelo. Miyo nkaahovenrye hata vakhani, hata vakhani. Miyo khimurukunuwela, nto khwira, “Bud, enookhala weiwe.” Nto varukununwaaka, vale yaari ekhaya [Nipuro vahiitthu mufiitani—Mol.] yeemenle osulu wahu, mwa imeeturu soophiyaka imiya thanu na tthaaru.

<sup>92</sup> Owo khukuxa ipinookulu, owo khwira, “Billy, tthiri, eyo ekhaya yuulupale yoottweelela!”

<sup>93</sup> Moone, ehulelo, yoowoona, Masu a Apwiya, khiyaavo etthu enwerya orukunxa Yaawo wala weemexa Yaawo. Etthu ekereja entthunaaya ohiy’ula kahi osoma. Etthu ekereja entthunaaya ohiy’ula kuhiyo muromolelo. Etthu ekereja entthunaaya ohiy’ula kahi eyaaminelo. Etthu ekereja entthunaaya ohiy’ula ti ehulelo ya Soolempwa, Mukhora. Yeeyo, Kristu ti Mukhora, ni Owo ti Masu. Waamini Masu a Muluku mukumi onnihula khula mukhora.

Muluku, munivahe ehulelo. Munivahe ehulelo.

<sup>94</sup> Aheperi, kapiitulu 12, anihimya wira, “Vano hiyo-tho nrukureriwe nneeku nuulupale n’anamoonna, nrowe nihiye itthu sothene sinnilemela, ni ohaamini onnirukurerya vookhweyavo.” Enihimya “etampi,” okhalaka wira, *etampi* “ohaaminii.” Munnona? Eri etampi emosa paahi, ekhanle ohaamini.

<sup>95</sup> Ni *etampi* enihimya “ovonya eninelo.” Ntoko moopelaka, mwavonya eninelo, vanreerela mmulokiherye kapwitthi anyu, moone, okhala wira yookhala ehilonke. Moovonya eninelo ene. Moone, mutthike mwehererye-tho. Munnona? Enihimya orukunuwa, moovonya eninelo ene. Mwaatthunaka okhala muKristu, vano munarowa wiitakaniha ni ekereja, moovonya eninelo ene. Mwaatthunaka okhala muKristu, khunamiseriwa mwa nsina “n’Atithi, Mwaana, Erooho Yoowaarya,” moovonya eninelo ene. Vanreerela mutthike. Khamunrowa onina exeko. Munootthukulaxa, vekeekhaixa. Eri Etthu emosa paahi enwerya wookhalihani muliinyani moolikana, eyo ti Yoolempwa, Bibilia, Masu. Maana, erimu n’ilapo ya vathi sinoovira, masi Masu a Muluku khanvira.

<sup>96</sup> Tivo, nvarele ehulelo, waamini Masu! Ni khula waamini vakhani munaamini anyu, ni muhihoveryaka hata vakhani, monoowerya ohula mikhora sothene siri eriyari ya nyuwo ni eparakha Muluku orinaawe wa nyuwo. Muluku anikhaliherye okhalana ihulelo, ti mavekelo aka. Nuuramihe muru vano wa nuulumo na mavekelo.

<sup>97</sup> Tith’ihu a Wirimu, hiyo ninnooxukhuruni Nyuwo ohiy’ula okhala wira Nyuwo moonivaha ehulelo wira enihulele woopowa. Miyo—miyo kinnooxukhuruni mwaha wa yeeyo, Pwiya, mwaha wa hiyo woopowa, ni mwaha wa ehulelo ninweryaahu orumeela mpakha va. Masi, Muluku, munivahe waamini, wira khula nimosa wa Masu ala alepiwe Muliivuruni mw’Anyu ti ivenxeryo

sikhaani, vano Ehulelo ela eniihaniwa Yesu..Mukhora ola, kinihimya, oniihaniwa Yesu; ni ehulelo, eniihaniwa waamini, enikwannya khula Masu, eyo ennitthukula. Eyo ennisusiherya vathi evenxeryo ele yaamukhaani ni ninoowerya okela mparakhani mmo. Tithi a Wirimu, munivahe ihulelo, wira niwerye owaamini anatiri a Muluku, wira waamini wahu ohivonye, wira niwerye okhala oowoovarelani muteko Nyuwo ni ale onkhalanaahu poromosa.

<sup>98</sup> Mulevelele etampi yothene y'ohaamini wahu, Pwiya, ni munikhaliherye wira nikhale Awinyu. Hiyo ninoorwa vano vameesa va ekomunyawu, ni miyo kinnivekela, Tithi a Wirimu, wira Nyuwo munilevelele sootheka sahu sothene, wira niwerye okela moohakalalani w'opatthana vameesa va Muluku. Hiyo ninvekela mwa Nsina na Yesu. Amen.

<sup>99</sup> Munn'aka mulopwana, muthiyana, mwakhalana ehulelo ya Momweneni, ehulelo ya Mukhora, ehulelo ya woopowa, Muluku ookhaliheryeni ohula mikhora ni omuhiya Yesu ovolowa. Mmuhiye Owo oovaheni itthu nyuwo muhi—muhinreeryaanyu otthunaxa.

<sup>100</sup> Vano, okathi vakhani paahi nihinatthi opacerya osoma sa ekomunyawu, kintthuna kihimye etthu okhala wira ti ya ekomunyawu. Ni naarwaaka waltaari nno, eri enamuna emosa paahi yo orwa, ekhanle, nakhalana-ru ehulelo ya waamini mmatatani mwahu, ennisuweliha wira itampi sahu sooleveleliwa. Vano hiyo naahikhalane ehulelo eyo wira nihule Mukhor'owo, wira itampi sahu sooleveleliwa, khanirina ehakhi ya vameesa v'Apwiya. Okhala wira, ole onikhuura ni onwurya ahiphwanelaka, onikhuura ni onwurya ehukhumu awe, ahithokoreryaka erutthu y'Apwiya. Vano, eyo ekeekhahi.

<sup>101</sup> Kinoona wira othene hiyo noosuwela wira olelo nihiku na Ekomunyawu na Mulaponi. Nla ti nihiku ikereja sothene sinaakhelaaya ekomunyawu. Ti Nihiku na Ekomunyawu na Mulaponi mulaponi mothene. Nto miyo kaahuupuwela wira yaamukhala yooreerela olavula nuulumo nimosa wala maili a ekomunyawu nihinatthi waakhela, okathi pastore, xontte, omiiraawe athokihaka Soolempwa soolikana wira nisome wa ma—mattharelo a vameesa v'Apwiya. Vano, ekomunyawu ila. . . Vano, nkinrowa opisa minuutu soophiyaka muloko.

<sup>102</sup> Ekomunyawu ila nimphavelaahu waakhela, ennikhalaka evaanyihanelo yuulupalexa ya miixuttiho sothene mBibiliyani. Eyo yaari yawaya. . . emosa wa ivaanyihanelo saya soopacerya mukereja yoopacerya. Ni olelo aPrustante, a ePiskopaale ni aMetotista, ni ikereja sinci-ene Prustante, aakupali vootteeliwa murima mwiiixuttiho w'Ekatolika, Katolika y'oRooma, yaawenrye-ru oxintta ekhottiheryo yaamukhaani ya ekomunyawu. Masi awo anookupali wira namukuttho otheleke ni akhale murumeyi, ekereja Katolika yaahiraana ni yeeyo

imaara sinci-ene mwa ikumanelo saya ni mithukumano. Awo anniiraana wa yeeyo. Ni awo animwiiraana mwa mavekelo oohiyana-hiyana, ni sikina, ekereja Prustante enimwiiraana wa yeeyo. Ni katikeesi ni sikina, altaari mwaamukhaani va ni vale, ni ekereja Katolika yoolikanana wira yeeyo. Masi vaphiyenryaaya ekomunyawu, awo amonre vaavo. Khula mutthu otonko omusoma wahala onnisuwela yeeyo. Masi, vekeekhai, mwa enamuna aka yo wuupuwela, awo yaahaana vanci-ene ohiya, kihinatthi—owerya okupali, moone, okhala wira kahiyo Bibilia.

<sup>103</sup> Masi kintthuna ehimeeriwe etthu emosa ekereja Katolika. Nyuwo moosuwela wira ekereja Katolika, wopaceryani, yaari ekereja y'arummwa ya pentekosite? Vekeekhai yaari yeeyo! Waari wopaceryani wa ekereja. Nto munnoona vatthu va—vatthu vaphiyenryaaya, awo aroothikela akumihaka Masu ehelaka-mo makano.

<sup>104</sup> Ni vaakhanle wira ekereja Pentekosite yaamukhala miyaakha emiya sikina, yaamukhala ottaiwenexa wa Bibilia ovikana ekereja Katolika siryaaya olelo, moota enrowaya olelo.

<sup>105</sup> Sitthuneiyeye iyaakha imiya sinci-ene, wira ekereja Katolika ekhume mwa Yaawo, iyaakha imiya tthaaru, okhuma ekereja yoopacerya mpakha wiitthokiha wa ekereja Katolika y'oRooma, yeeyo awo apacenryaaya. Vano awo ahaavara murima, yaaruuhaka atthu aalupale oottittimihiwa ni itthu siiso, vano awo khukumihela *ela* khuhela-mo *ela*, ni khukumihela *ela* khuvenxa *ele*, khwaakumiha amulukulu eethiru apakawu khuvenxa itthontto sa eKristu, ni siiso, nto ahiereryaka Eyo mpakha ophiyerya ele arinaaya vano, ekereja Katolika y'oRooma.

<sup>106</sup> Ni ekereja Pentekosite Y'ovaanyihela okhuma i—iyaakha miloko mithanu eyo enkhalakaaya, ni woonaka wira yoomora vale vapacenry'aya enrowa okhala mukhalelo wootepa ovikana ekereja Katolika, muhina mwa iyaakha emiya okhuma vano. Ti yeeyo. Nlo nuulumo nuulupale n'ohimya, masi nwehe paahi vatthu awo amoralyaaya. Naanaanoru khukela mmutthenkesoni, awo aroorowa ahiereryaka *ela n'ile*, ni itthu sothene sikina. Nto awo anoorowa, moone, etthikaka.

<sup>107</sup> Masi, *ekomunyawu*, eniihaniwa “olya w'Apwiya.” Vano, atthu anci-ene, antthuna waakhela voosiisu. Khehimmye mBibiliani wira waari olya Wawe wa *voosiisu*. Ni moota atthu ala olelo, moota anweryaaya nlelo wira “olya w'Apwiya,” nave awo khaniira. Awo aroothikela *olya*, khukumihela, nto khwiihana “yolya y'ohiyu,” ethiru. Olya!

<sup>108</sup> Vano, kweekwe evaanyihanelo okathi wa Bibilia, yaari evaanyihanelo okathi ule. Atthu khayiwale oratteene olya w'Apwiya. Okathi jaarwaaya vameesa, Paulo aahaahimeerya aKorinto ale, wira awo yaamurwa n'uhapaliwa vameesa

v'Apwiya. Moone, eyo yaari oohiiwiwa saana okathi ene yoowo. Owo khwira, “Mwatthuna olya, mulyeeke owaani.”

<sup>109</sup> Ni etthu ekina, khayiiwiwe saana, wira yaari exeeni. Anatampi, ni atthu akhalaka mutampini, yaanirwa ni waakhela ekomunyawu. Nto eyo khayiiwiwe saana. Mulopwana mmosa akhalaka n'ame awe, mai oomukhaliha, nto ekereja yaahimuleela yeeyo; nlelo aakhelaka ekomunyawu vameesa.

<sup>110</sup> Ni waahikhala okawanyeya eriyari aya, nave awo nlelo yaanaakhela ekomunyawu. Owo khwira, “Kinnisuwela wira muneetta ntoko Amalapo akina. Ni wookhala—wookhala ohiiwanana eriyari anyu, ntoko sikhanyaaya va—vanci-enexa owannyawe Sefa, ni siiso.” Khwira, “Nyuwo muneetta ntoko Amalapo akina.” Moone, yaari yoohiiwiwa saana.

<sup>111</sup> Ekomunyawu kweekwe enkhalaka yoohiiwiwa saana. Vano, kaamuwerya okelela ohoolo ni yeeyo iwoora sene, masi nihaana okhalana ekomunyawu ila ni orapiha inawu. Vano awo arookumiha paahi orapiha inawu khuluwiru, ohiya miromolelo vakhani paahi. Anci-ene w'aPentekosite arimwiihuluxa eyo voomalela. Munnona? Ni nlelo eri mBibiliani siiso elemppaaya. Munnona?

<sup>112</sup> Vano, Rooma khoniihana “ekomunyawu.” Awo aniihana “emiisa, emiisa yoowaarya.” Awo khanaakhela ekomunyawu, awo aniira epantte ya emiisa. Eyo emiisa, nto emiisa vekeekhai enkumiha yoohimya y'ekeekhai ya ekomunyawu. *Emiisa* enihimya “muroromelaka.” Awo aniira epantte ya emiisa, eroromelaka (wira yaairaka yeela vamiisani) wira Muluku onimwaalelela itampi saya, yaakhelaka “erutthu y'ekeekhai ya Kristu, yeeyo namukuttho onrukunxaawe khukhala Erutthu ni Ephome ya Kristu,” waakhela yeeyo, eroromelaka wira Muluku onookumiha itampi saya mwaha wo wira siiso. Eyo emiisa.

<sup>113</sup> Maprustante aniihana “ekomunyawu.” Ekomunyawu enihimya “oxukhuru.” Wira muPrustante...muKatolika oniira epantte ya emiisa, mmiisani ororomelaka wira Muluku onimwaalelela mwaha wa soowiira saya sootakhala. muPrustante onaakhela ni oxukhuru mwaha wa ele yiiriwe ni ekomunyawu ni Muluku; opatthanaka ni Yoowo, wira ehiriwa. muKatolika onooromela wira enimwiiriwa; Prustante onihimya wira ehiriwa. muKatolika onimwiikoha khama itampi sawe sooleveliwa; muPrustante onoohimya wira sooleveliwa, wira owo t'otaphuwa. Ni ekomunyawu onkhala opatthana ni Muluku. Ni malakano ala hiyo ninkuxaahu, kahi mwa *miroromelo* wira itampi sahu sinooleveliwa, masi *ti* sooleveliwa. Okhala wira eyo... Nimosa nrromelo; nto nikina waaminii. Mmosa onroromela wira ori oratteene; nto mukina oosuwela wira ori oratteene. Munnona? Mukina, mmosa onooromela, okhala wira owo

khonsuwela vamphwanyanyaawe; mukina onnisuwela wira owo ori oratteene, okhala wira onnisuwela etthu Muluku ohimyaawe. Ti yeeyo. Eyo t'evirikanelo. Tivo, mwaaromeleka paahi, mwiikasoope; masi mwaasuwelaka vale, vano mukeleleke ohoolo. Moone, vano muri moopatthanani ni Muluku. muPrustante ori, owo onihimya wira ooleveleliwa ni onnisuwela; muKatolika orina emiisa, onroromela wira onoleveleliwa. Eri ntoko sa: mmosa namalola, ororomelaka wira sothene siri saana, moone; mukina namalola axukhuru mwaha wa etthu yiiriwe. Oowaili aya anamalola. Masi mmosa onoolola, ororomelaka wira onimwaakhela; namalola mukina oosuwela wira ohaakhela, ni oomuxukhuru Owo mwaha wo onvaha. Vano, vo ti vari evirikanelo. Eyo ekomunyawu. Ayo, mulopwana. Mmosa onooromela wira oleveleliwe; mukina aya oosuwela wira ooleveleliwa, ni onooxukhuru mwaha wa yeeyo.

<sup>114</sup> Tivo, ekomunyawu ti y'aKristu ayariwe vasya ni Erooho ya Muluku. Ni *oyariwa vasya* khenihimyaxa vano wira muhaana Erooho Yoowaarya. Vano muupuwele. Vano, anci-ene aniixuttiha yeeyo. "Miyo nkimmusuwela mutthu oniixuttiha siisa," ntoko mutokweene Munna Arganbright saahimyaawe ohiy'ule vapulpitu va, moone. Masi, oyariwa vasya khuhiyo opatiiso wa Erooho Yoowaarya. Yoolempwa khenlipiherya eyo, miyo kinoona wira nnari, moone, wa enamuna aka yo wona. Munnona? Miyo kinnaamini wira nyuwo mooyariwa vasya. . .

<sup>115</sup> Ni mwaha wa yeeyo miyo enrumeelaaka nuulumo opatiiso mwa Nsina na Yesu Kristu, masi kahi wa oyariwa waneenli. Vano, Pentekosite, ekereja ya Pentekosite Yowiiraana empatisa mwa Nsina na Yesu wa oyariwa waneenli. Miyo nkinaamini iyo. Ni awo yiireke yatthuna vale. Masi miyo kinnaamini wira Petru ohimye wira, "Murukunxe murima," toko. Maasi khanlevelela itampi. Ekereja ya Kristu enlaleya siiso. Masi kinnaamini wira orukunxa murima, oriipiwa murima volikana ni Muluku; *orukunxa murima* enihimya "orukunuwa, otthika," moovonya eninelo ene, "mpacerye-tho." Mwiire yeeyo toko! Ni opatiisiwa wanyu mmaasini ohimya paahi ota ya etthu yiiriwe muhina mwanyu, wira nyuwo moomukupali Kristu okhala Moopoli anyu.

<sup>116</sup> Kinoona wira ekereja va paahi ohiy'ula, ntoko sinsuwelaaka, miyo nkinkhala voophiyerya osuwela t'ani onrwa wala nnari. Miyo kaahuulumeliwa vakhani nno woohikhala khalayi mwaha wo ompatisa mulopwana mmosa va mutankini, muulweene mmosa. Vano miyo khurowa wa yoowo, owo aari mulopwana muulweene ooreera murima. Kaahikhalana mureerelo wo oweetiherya amusi awe othene wa Kristu, othene aya aKristu. Mulopwan'ola mutokweene aari mutokweene ooreera murima, ni miyo aanikisivela, vano miyo khurowa wa yoowo khumwiirela, "Paapa, muhinkhalela-ni muKristu?" Owo onnikiphenta.

117 Owo khwira, “Munna Branham, miyo kinookhala muKristu kawerya-ru okhala ooloka voophiyerya.”

118 Miyo khwira, “Kinimooleelani etthu yo wira, Paapa. Nwehawehe mpakha mphwanye vatthu mukhanlyaanyu okhalaka ooloka voophiyerya, vano mukileele nipuro xeeni nlo, ni miyo, kintthuna kirowe.” Miyo khwira, “Kristu khaarwenle owoopola atthu ooloka. Owo aarwenle owoopola atthu ootakhala.” Muupuwelaka-ru wira mwa ooloka, vano Owo khorwenle owoopolani. Owo aarwenle owoopola ale Owo onsuwelaawe wira t’otakhala. Munnona? Kristu okhwenle owoopola anatampi. Munnona? Nto miyo khwira, “Paapa, yookhala eliinya va.”

Owo khwira, “Ahe, miyo kinnaavura asikaro ala.”

Miyo khwira, “Nkinrowa hata olavula yeeyo.”

Owo khwira, “Miyo kihehererya waahiya, Munna Branham.”

Miyo khwira, “Vaareera, khaninrowa olavula mwaha wa asikaro.”

Owo khwira, “Ahe, kawerya-ru . . .”

119 Miyo khwira, “Muhi—muhihimye-tho etthu ya yaawo, mwaaliyale. Kintthuna kookoheni etthu.”

Owo khwira, “Vaareera, exeeni iyo?”

Miyo khwira, “Munnaamini wira ookhala Muluku?”

120 Khwira, “Vekeekhai, miyo kinnaamini.” Khwira, “Miyo kinnaamini siiso ntoko nyuwo, woona waka, Munna Branham.”

121 Miyo khwira, “Munnaamini wira Muluku ene yoowo ooviraha nloko Nawe vano khwiipaka erutthu khukhala ni hiyo mwa omutthu wa Yesu Kristu, wira amoopole mutthu?”

Owo khwira, “Ayo, miyo kinnaamini eyo.”

“Ni wira Owo okhwiye wira owoopole anatampi ntoko nyuwo ni ntoko miyo?” Munnona?

“Ayo, miyo kinnaamini eyo.”

122 Miyo khwira, “Vano, eri sa. Hiyo othene nri empa emosa yuulupale nno, ni niri mukhatteya, ni nkikhanle weemelaka vanloothoni va ni wira ‘ola onookikhaliherya okhuma mukhatteya,’ kinimweemela vanloothoni vale ni wira ‘ole onookikhaliherya okhuma mukhatteya,’ hiyo othene nri mukhalelo mmosaru. Ni khula mutthu oyariwe molumwenkuni mu oyariwe mutampini, opakiwe mwa sootakhala, orwiye molumwenkuni oothaka. Owo namakhootta, opacerya wene.”

123 Mutthu mmosa aahikoha nihiku nlo, owo khwira, “Munna Branham, vakhala wira . . . yaamukhala evirikanelo ya Atamu ni Hawa, ni an’aya olelo, vaakhanle wira awo othene khawanre



etthu, yeettaka mu...Yaamu—irutthu saya saamukhala imosaru?”

<sup>124</sup> Miyo khwira, “Nnari, mulopwana.” Hiyo naatthikela owaani nuumala oxaya ikhopa, Munna Fred ni miyo, ni anci-ene aya. Miyo khwira, “Nnari, awo khiyaarowa okhala oolikana.”

<sup>125</sup> Khwira, “Munihimya wira Hawa khaarowa okhala muthiyana ntoko an’awe axithiyana, ni Atamu khaarowa okhala mulopwana ntoko an’awe alopwana?”

Miyo khwira, “Mwa mikhalelo sinci-ene, masi kahi mwa mikhalelo sothene s’erutthu.”

Owo khwira, “Exeeni yaarowa okhala yoovirikana?”

<sup>126</sup> Miyo khwira, “Awo khiyaarowa okhalanasa mutekhu. Awo yaaroopattuxiwa. Khweeli. Awo khiyaaluttanne ni hat’etthu.”

<sup>127</sup> Vakhalaru wira eyo eniheleliwa othene oniyariwa molumwenkuni mu, enooniherya wira ti yookhotteya, opacerya wene. Eyo ekeekhai. Miyo khwira, “Vekeekhai, yookhala evirikanelo. Awo khiyaarowa okhalana mutekhu. Awo khiyaaluttanne ni hata muthiyana, wira erwaase mu.” Moone, Muluku aarimwaapattuxa.

<sup>128</sup> Vano, miyo khwira, “Kintthuna kihimye etthu. Khula mutthu mukhatteya mu, taani okhanle oowaarya? Taani ohiyariwe mwaha w’ekhapa? Taani onwerya omukhaliherya mukina, hata wira owo exeenii? Hiyo othene nri mukhatteya muumu. Masi Muluku ohikhaliha mmosa wa soopattuxa Sawe khurwa vooikhala ekhapa, ni Ephome yoowaarya Owo aapattunxaawe Mmansawe, ni mwa Ephome yeeyo Owo khunivuluxa.” Miyo khwira, “Munnaamini yeeyo, Paapa?”

Owo khwira, “Miyo kinnaamini eyo.”

<sup>129</sup> Miyo khwira, “Kristu omukhwenle mutthu ootakhala ntoko nyuwo. Vano, eri enamuna emosa paahi yo wira. Khiivo hat’etthu mukhanlyaanyu wiiraka. Owo onnoovahani. Khimukhanle ophwanelaka. Khiyaavo mukhanlyaanyu wiiraka wira mphwanye. Owo onimoovahani paahi. Munookupali etthu Owo owiirenyaaaweni, wira yookhoottiheryeni orowa omooroni?”

<sup>130</sup> Owo khwira, “Miyo kinimwiira yeeyo.” Owo khwira, “Masi vaakhanle wira kaaniwerya waahiya asikaro ala.”

<sup>131</sup> Miyo khwira, “Asikaro animwiikhapelela mmansaya. Nyuwo paahi...Miyo nkinookohani. Miyo nkihiyo namatthariha ikano. Miyo kinnaamini mahala. ‘Ni Othene ale Atithi akivahalyaaya animoorwa wa Miyo.’” Miyo khwira, “Mwaamini-ru yeeyo ni murim’anyu wothene!”

Owo khwira, “Ni murim’aka wothene, miyo kinnaamini.”

<sup>132</sup> “Vano nyuwo munookupali muttharihaka yeeyo, wira khamuniphwanela, masi Owo t’okhanle Ole omphwanela?”

Muhiweheke nyuwo; munweheke Yoowo, okhala wira khamunwerya wira hat'etthu mmansinyu. Munweheke Ole owiirenleni etthu. Ankhi Yoowo?"

"Oh," owo khwira, "Owo t'ophwanela."

Miyo khwira, "Ti yeeyo, vano mukupali etthu Owo onoovahaaweni."

Owo khwira, "Miyo kinookupali."

<sup>133</sup> Vano miyo khumpatisa mwa Nsina na Yesu Kristu. Nto owo khukhuma va khumpattiha sikaro.

<sup>134</sup> Isumana vakhani sivinre miyo kaari owannyawe. Kaahikhalana yoowoona ohiyu umosa, ya mwiri mmosa woolekela wiikithiwaka, woowuaramela vathi. Kaahoono ithaapwa sikhomeliwe vaavo. Epannte ya ethaapwa yookiserya yaahikhala ethaapwa yowooneyaxa. Nto vathi va ethaapwa eyo, vakhiviru va okerekhere, ekhumaka ntoko *sa*, mwiri wanteiyee vaavo vene. Nto Nsu nimosa khwira, "Mwaahaana wira mukhanle nyuwo," wala, "Mwaamwiira mukhanle nyuwo." Nto Paapa Cox khumora khuwereeya ettuli awe *va*. Nto siiso voosiisu aya khuruuheliwa asikaro awe oryeene voolilini, otthuna waahimuhiya. Isumana sivinre! Owo khomulawinhe hata mmosa, khommutthuna hata mmosa wala etthu ekina. Munnona? Vano miyo koomoona okathi vakhani ovinre, okathi matat'awe yaaryaaya ookhwila othene, isumana vakhani sivinre, mwaha wa asikaro, nto vano owo khonwerya hata onvilela mmosa okhala vakhiviru ni yoowo. Muhele itthu soopacerya toko! Muhehererye okhala ooloka; nyuwo mwa ootakhala, opacerya wene, ni khiivo mukhanlyaanyu wiiraka. Wookhala mukaano woovalaaniha, ni atthu othene ari epantt'ile.

<sup>135</sup> Vano, okathi oyariwaaka molumwenkuni mu, waari moothelanani wooreera, w'atithi aka n'ame aka; mmirimani mwaya naahikhala nooce, mwa itthu s'atithi aka yaari erukuruku y'ephome. Ekumi aka enkhalihiwa n'erukuruku yeeyo y'ephome (kahi ni nooce n'ame aka), ni erukuruku y'ephome y'atithi aka. Nto okathi erukuruku ile y'ephome eronwaaya voopuroni vaya voolikana wira ekumane ni nooce, vairalyaaya, ephattu yaahirummwa ni Muluku wira ekivahe erutthu. Vano nto miyo khuyariwa munlokoni mwa atthu, kivahiwa mureerelo wo—wo okhala mutthu oosuwela ntoko atthu, vaavo kaakhanlyaaka weettihaka ekaaroo, wala kaakhanlyaaka wiiraka itthu ntoko atthu siniiraaya, weetta, olavula, weettiha ekaaroo, ni sikina. Kivahiwa yeeyo, okhala wira kiyariwe mw'emusini mwa atthu, ni koovahiwa owerya wo osuwela wira kikhale mutthu.

<sup>136</sup> Vano, vayariwaaka mw'emusini mwa Muluku, kirwiiye ni Ephome, Ephome yookivaha Ekumi. Vano nto vakhanlyaaka mukumi mwa Kristu, Owo ookipatisa ni Erooho Yoowaarya ni owerya, wira kikhale mwaana a Muluku. Vano, ntoko

siiso kaaweryaaka weetta, olavula ntoko mutthu, weettiha ekaaro aka ntoko mutthu, vano okathi onaakhelaaka Erooho Yoowaarya, kinaakhela owerya wo owoomola axetwani, olavula ilavulelo isya, olaleya Ehapari yooreera, waavoniha aretta. Miyo koopatisiwa! Kahi oyariwa; masi opatisiwa!

Yaathukumanne empa y'osulu,  
Othene evekelaka mwa Nsina Nawe,  
Awo yaahipatisiwa ni Erooho Yoowaarya,  
Ni owerya wo ovara muteko waahirwa.

<sup>137</sup> Amen. Nyuwo munaaminela Ekumi Ehinimala, ni muniyariwa vasya mwaha wo waamini wanyu. Yesu oohimya, mwa Yohani Oowaarya 5:24, "Ole oniwa Masu Aka ni onimwaamini Ole okirumme, ookhalana ekumi ehinimala," kahi Erooho Yoowaarya, ookhalana ekumi ehinimala paahi. Owo oniyariwa mw'emusini mwa Muluku. Vano nto onoopatisiwa mwa Erooho Yoowaarya, ni owerya wo osuwela wo waamini, waamini Ehapari yooreera ni ohela Yeeyo wira evare muteko ni wiiriha Eyo wira vooreera. Amen. Vano owo oniira ntoko mwaana a Muluku. Vano owo onoowerya owoomola axetwani. Yesu ohimye wira, "Ithoonyeryo iya sinimwaatthara!" Munnona? "Mwa Nsina Naka anoowoomola axetwani, anoovavula ilavulelo isya, anoovara inowa, anoowurya itthu siniiva." Moone, owo onaakhela owerya ni Erooho Yoowaarya, wira aireke itthu iya.

<sup>138</sup> Vano, okathi oronwaawe, Owo iirale, "Vanreerela Miyo kirowe. Maana, Miyo kaahirowe-ru, Erooho Yoowaarya khenrowa orwa." Munnona? Vano okathi Owo onrwaawe, Owo onimwaakhupaliha athu mwaha w'etampi, ni onimwiixuttiha exariya, ni onimooleelani itthu sinrowa orwa (iyo ti soowona). "Owo onookuxa itthu kiwiixuttihaly'akani, ni onooowupululelani." Masu ene wira Owo ohoorwa... Khaavo onwerya wiiwa saana Masu ohirina opatiiso wa Erooho Yoowaarya. Ni mutthu aahimyaka wira ohaana opatiiso wa Erooho Yoowaarya, ni onavaanyiha wira Masu aakhalana exariya, yookhala etthu ehilonke.

<sup>139</sup> Paulo aari namuulumela a Waataana Wa Naanaano. Khaari, Waataana Wa Naanaano khiwaalempwe. Paulo aari namuulumela a oKristu, Saulo. Nto vaakhenlyaawe Erooho Yoowaarya, owo aaronwe miyaakha miraru wAsiya khusoma Soolempwa, okhala wira owo aasomihiwe ni Kamaliyeli, musomiha muulupale. Vano vatthikalyaawe, nto miyaakha muloko ni mixexe ohoolo waya, aahirowa okumana ni Petru oYerusalemu, khuphwanya wira awo yaari Masu ni Masu mwa Ehapari yooreera emosaru. Muluku mmosaru yoowo aamwiirinhe Petru olaleya nihiku na Pentekosite ni khwaaleela wira arukunxe murima ni apatisiwe mwa Nsina na Yesu Kristu, Erooho Yoowaarya emosaru yeeyo yaahimuupululela Paulo, vano owo aahaahimeerya mwa Miteko 19 amanle-ene opatisiwa

emaara emosa ni Yohani, khwira, “Muhaana opatisiwa-tho, mwa Nsina na Yesu Kristu.” Munnona?

<sup>140</sup> Moore, Erooho Yoowaarya enkhala voolikana ni Soolempwa. Waamini waya mwa Yeeyo enniththukula khula mwiirirya. Amen. Bibilia oohimya, mwa Yohani Oopacerya 5:7, “Aakhala araru ankhalela onamoona, Wirimu: Atithi, Masu (yaawo aari Kristu), ni Erooho Yoowaarya. Ala araru ari Mmosaru.” “Ni aakhala araru ankhalela onamoona vathi: maasi, Ephome, Erooho. Ala araru kahi mmosaru, masi aniiwaanana mwa mmosa.” Vano, khimukhanle okhalanaka Atithi muhikhalanne Mwaana, khamukhanle okhalana Mwaana muhikhalanne Erooho Yoowaarya; Awo ari Mmosaru. Masi nyuwo pooti okhalihwiwa naxariya muhikhanle ooreerihwiwa, vano pooti oreerihwiwa muhikhalanne Erooho Yoowaarya. Oreerihwiwa onkhala ni Ephome, mwa Ephome enoorwa Ekumi. Munnona? Nto Erooho Yoowaarya ti owerya wa Muluku, moone, owerya ovahiwe ekereja.

<sup>141</sup> “Munimwaakhela” (exeeni?) “owerya,” Miteko 1:8, “nuumala yeela Erooho Yoowaarya enimookhuruwelani. Munimwaakhela owerya!” (Kahi “munooyariwa vasya.”) “Munimwaakhela owerya nuumala Erooho Yoowaarya wookhuruwelani. Nto munookhala anamoona Aka oYerusalemu, oYuteya, ni oSamariya, mpakha omalenle elapo.” Munnona? Nyuwo munaakhela owerya vanaakhelaanyu Erooho Yoowaarya. Masi yoopacerya muhaana waakhela Erooho Yoowaarya, nto iwo owerya wa Muluku, moone, wira mooniherye ni muthoonyerye. Nyuwo mwa—nyuwo mwa... okhala wira mwaari mutthu, nto khwiixutta olavula ni weetta ni wira itthu mutthu siniiraawe; okathi onipatisiwaanyu ni Erooho Yoowaarya, munivahiwa owerya wira mwiireke ntoko aana alopwana n’athiyana a Muluku. Khivanxankiha atthu wiiraka ni opakaka ntoko siniiraaya olelo, awo khanatoko osareya Erooho Yoowaarya. Yaasareiye-ru, yaamwiira voovirikana. Awo anihimya wira aakhallana, masi Yesu ohimye wira, “Ni mihokorokho saya munimwaasuwela.” Vano muniwerya sayi wira yeeyo, moone, eyo ti yootepanyeya tu. Munnona? Masi nitthikeleke sookhumelela!

<sup>142</sup> Vano, nyuwo mweettaka oratteene ni viihimya okhala muKristu, hiyo ninnoolattulani ohiy’ula vameesa v’Apwiya. Olelo, voohihoverya, ekomunyawu ehaakheliwa elapo yothene, akina mwa enamuna emosa ni akina mwa ekina. Masi kinoona wira enamuna yooreera wira onkhala otthara Soolempwa, voolikana ntoko awo siiralyaaya mwa Soolempwa. Kinoona wira eyo yaamukhala yoophiyerya.

<sup>143</sup> Mookhalana Bibilia anyu, Munna Neville? Munna Neville vano onoosoma Soolempwa.

[Munna Neville oniira, “Kapiitulu 11 y’aKorinto Oopacerya, opacerya versiikulu 23:”—Mol.]

*[Okhala wira kaakhenle wa Apwiya yeeyo-tho kiwiizuttihalyaakani, Wira Pwiya Yesu ohiyu yoole waavarihiwaawe aahikuxa mukatthe:]*

*[Vano nuumala oxukhuru, aahikawanya, khwira, Mukuxeke, mukhuureke; ela ti erutthu aka, enivahiwaanyu nyuwo: mwiirke iya mukuupuwelaka miyo.]*

*[Siiso-tho vaamanle-aya olya, aahikuxa ekahi, airaka, Ekoopho ela ti waataana wa naanaano mphomeni mwaka: mwiireke yeela, ikwaha sothene nyuwo munwuryaanyu, mukuupuwelaka miyo.]*

*[Tivo okathi wothene munikhuuraanyu mukatthe ola, ni munwureryaanyu ekahi ila, munilaleya okhwa w’Apwiya mpakha vanrwaya.]*

*[Tivo ole onikhuura mukatthe ola, ni onwurerya ekahi ela y’Apwiya, ahiphwanelaka, onnithekela erutthu ni ephome ya Apwiya.]*

*[Masi khula mutthu apaceryeke okoha murima awe, nuumala akhuureke mukatthe owo, ni awuryeryeke ekahi iyo.]*

*[Okhala wira ole onikhuura ni onwurya ahiphwanelaka, onikhuura ni onwurya ehukhumu awe, ahithokoreryaka erutthu y’Apwiya.]*

*[Vano mwaha wa yeeyo anci-ene ari oohilipa ni aretta eriyari anyu, ni anci-ene anrupa.]*

*[Okhala wira hiyo naaiphuka mmansihu, khinaaphukiwa.]*

*[Masi okathi nimpukiwaahu, ninnittharuxiwa n’Apwiya, wira nihihukhumuwe vamosa ni olumwenku.]*

[“Apwiya areerihe osommwa wa Masu Aya.”]

<sup>144</sup> Kweekwe etthu yoowaaryaxa, etthu yooreerihiwa, kookupali wira nihaana wuurama muru vano nivekelaka vooaaleleya. Mukivekelele, miyo kinimoovekelelani. Nrowe nivekelelane mmosa ni mukhw’awe, wira Muluku animorele ikharari hiyo soopattuxiwa soohiphwanela ninhalela wira mpantte wa esakramento ela yuulupale nuupuwelaka okhwa wa Pwiya ahu.

<sup>145</sup> [Munna Branham onimweemela mwaha wa mavekelo oomaaleleya. Nipuro vahitthu mufitani—Mol.] Nivekelo nla na olapa hiyo ninoovahaahuni Nyuwo, Tith’ihu, vasulu v’altari Anyu a weero, ni Mukuttho ahu, Pwiya Yesu. Hiyo ninvekela mwa Nsina Nawe. Amen.

146 Vano kookupali wira mahumu anookuxa opuro aya, ni awo anoo...wa ekereja, ni animwaaruuha atthu okathi awo anrwaaya, eliinya ti eliinya, vakomunyawuni. Kweekwe kinuupuwelaka nsipo nle:

Mwaapwittipwitthi oophenteya okhwiye,  
 Ephome Anyu yooreerexa  
 Khenimala owerya waya,  
 Mpakha Ekereja yothene yoovuluxiwa ya  
 Muluku  
 Woopoliwa, wira ehittheke-tho.

Nrowe nuuramihe muru.

147 Tithi oomoriwa ikharari ni Oowaarya, Yehova, Oowerya sothene muulupale, nveleelihe iparakhha Sanyu mw'atthu Anyu okathi onlipelelaahu. Mulevelele itampi sahu. Nto vano hiyo ninnoovahani Nyuwo esakaramento ela, eviinyu ila, iwuuva saaliwe, nto matata a arumeyi khunyakatta. Ni khupakiwa eviinyu wa niwoko vano ninruuhelaahu wa Nyuwo, wira eyo ethoonyerye Ephome ya Pwiya'ahu Yesu Kristu. Miyo kinoovekelani Nyuwo, Tithi, wira mureerihe eviinyu ni niwoko nenlo. Mulevelele khula etampi ahu. Ni wira khula mutthu onaakhela eviinyu ela mw'erutthuni mwawe, akhalane ekumi, ikuru, ni woopoliwa wa Nyuwo. Munivahe, Pwiya. Hiyo ninvekela mwa Nsina na Yesu. Amen.

148 Biblia ohimnye wira okathi Owo okawannyaawe mukatthe khureeriha, khwira, "Mukuxeke mukhuureke, ela Erutthu Aka munvahiwaanyu. Mwiireke ela mukuupuwelaka Miyo." Nto hiyo naakuxaka mapattuuxa ala makhaani a mukatthe, kosher, onipakiwa woohikhala miropo, onipakiwa ni aKristu, owo onipakiwa okhala wira eyo—eyo enthoonyerya Erutthu ya Kristu. Hiyo noosuwela wira—wira yaari awiixutti a nihiku na Kristu, ahiiso nihiku na ekereja, yaakuxale mapattuuxa ala khupaka yoolya woolyaani wookiserya, woolyaani wookiserya wa Kristu. Ni mBibiliani, yaari awiixutti jaarumeela itthu iya atthu. Nto olelo, awiixutti ahu a vano, axinn'ihu va a ekereja, awiixutti a Niwoko nenla, annaarumeela atthu. Ni awo anookuxa mapattuuxa ala yaavahe atthu.

149 Nto vano mwaakhela mukatthe ola, muupuwele, owo onimuthoonyerya Mwaapwittipwitthi. Miyaakha sinci-ene sivinre okathi mwaapwittipwitthi a Isarayeli ooxiwaawe vamooroni, ni khukhuuriwa vamosa ni malaxi oowaawa, atthu yaahikhallana ikuru; ixapattho saya khisaathanle, ikuwo saya khisaathanle, mukwaha wothene mpakha awo ophiya muttethe aya wa natiri. Muluku anisuke n'ekumi, oohakalala, nimurumeelaka Yoowo mpakha niphaye Muttethe wa Natiri Owo onivahalyaawe.

Nivekele.

<sup>150</sup> Tithi a Wirimu oomoriwa ikharari, okathi onlavulaaka ohiy'ula sa Erutthu ele Yoowaarya, yooreerihwa ya Pwiya ahu, mwa Yoowo mwaakhala omalela wa oMuluku, kuupuwelaka Erutthu iyo evulalihiwaka ni—ni ekuphuliwaka, nto Ephome ekhwalalaka, ettuli Awe ni iparari Sawe sooneyaka, miwaxuxo osulu ni vathi ottuli Wawe, kuupuwelaka mukatthe ola wooturuwa, ni woomaniwa ommuthoonnyerya, eyo ennoorwatho mmurimani mwahu, ninnihela murim'ahu, Pwiya, vasulu va altaari Anyu ohiy'ula. Munilevelele, O Muluku. Ni mukatthe ola woopwexakasiwa, waakelaka, mwaano mwa arumeyi Anyu ala, ni esuwele wira yaari Erutthu Anyu yooreeraxa yaanyakattiwe ni yaahaaxiwe, nto ni makhwatta hiyo noovonihiwa. Munivahe, Pwiya. Mureerihe mukatthe ola kosher wa niwoko onthuneliwaaya. Hiyo ninvekela mwa Nsina na Yesu. Amen.

Mulipelele vakhani.

<sup>151</sup> Kehiyo ekomunyawu yoowaliwa. Khula mulipa-oowaamini muKristu pooti orwa vameesa v'Apwiya, wira okhalane opatthana nno ni hiyo...?... 

62-1007 Ehulelo Ya Mukhora  
Branham Tabernacle  
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)